

मरकुस मरकुस रासता बेसता कबुर

इद पुस्तकमता बारेमते गिचचो परिचयम
रासतोना पोरोल: मरकुस

रासता कालम: इसवि सन 60-64

मरकुस येसुना वरोर सिस्स्युड मत्तोर. पेनदा मरिं येसु किरिस्तु लोकुलकुनाहाटीं बतल-बतल कीतोर, इवुना बारेमते ओर इद पुस्तकमते रासतोर. इद बेसता कबुर, असल अयते सामिन विस्वासम कियवोराहाटीं रासतोर. अदुनहाटीं येसु सामि कराहता पोल्लेकन्ना, ओर कीता इचंन्रमाता कबाहकुनपोर्रीं एक्को जोर हीसि रासि मंता.

अस्के येसु सामि देय्याल्क पीसि मत्ता बचटूकुनो ओरव्टेताल देय्याल्कुन गेदमिसि, ओर्कुन बेस कीतोर. अल्हेने बच्चुटुरो एळिकने, तकलिपकुने मत्तोर्कुन, गुडिडकुन गूनिर्कुन बेस कीतोर. येसु सामि लेक्का हिल्वच्चुं अद्बूतमातव आनि महिमातव कबाहकगुडा कीतोर. हेय्युं वेय्कुना मंदिक हेय्युं हारिने पीरमेड गाटो दोसमळ, हातोर्कुंक जीवा अरहमळ, एतपोर्रीं ताकमळ इल्हा वेल्लेने इचंन्रमाता कबाहक कीतोर.

असल येसु इगे बूमिपोर्रीं बल्हा पिसतोर, बतल-बतल कीतोर, कूसुन पोर्रीं मोल्लां कोह्किसि वेलाड वाटसि हळ्कता पजा मूड रोजकुने बल्हा तेदतोर, मर्रां मल्सि स्वर्गमते होंचि पेनबाबाना पक्कते उद्दिदिसि दुनियातुन बल्हा ताकिचेके मंतोर, इवन्नि इद पुस्तकम हदविते तेळियंता.

अदुनहाटीं बोर-बोर अयते पेन पोर्रीं विस्वासम कीसि दान मोळ्कंतुरो ओर्क बस्केळ्क पिस्सना पिस्वर दोर्कता इंचि इद पुस्तकमते रासि मंता.

बग्गा बतल मंता

बेसता कबुर सुस्व आयमळ 1:1-13

गालिलते लोकुलकुना नड्डुम येसु सेवा कबळ कीतोर 1:14-9:50

गालिल एरियाताल येस्सलेमदाका येसुना सेवा कबळ 10:1-52

येस्सलेमते येसुना आकिर वारम 11:1-15:47

येसु हासि मर्रा जीवाते तेदमळ 16:1-8

येसु सिस्स्युल्कुनतोनि वळ्किसि स्वर्गमते होनमळ 16:9-20

बेसता कबुर सुख आयमळ
(मत्तयाल 3:1-11; लूकाल 3:2-16)

- 1 पेनदा मर्रि, येसु किरिस्तुना बेसता कबुर इल्हा सुख आता.
- 2 पेनदा कबुरतोर यसायाहना पुस्तकमते, “हळा! नना नीकन्ना मुन्नेने नावा कबुरतोन लोहंतन. ओर नीवाहाटीं हरिं तयार कीतोर.” इंचि रासि मंता.✧
- 3 वरोना अल्किर बय्लि जेगाते, “सामिनाहाटीं हरिं तयार कीम्टु, ओना हरिं सवरगा कीम्टु,” इंचि केंजा वासेक मंता,✧ इल्हा बापतिस्मा हियना योहानुना बारेमतेन पेन वेहचि मत्ता.

बापतिस्मा हियना योहान

- 4 पेनदा कबुरतोर रासतापे बापतिस्मा हियना योहान बय्लि जेगाते वासि लोकुल्कुंक इल्हा वेहालय दलगतोर, “कीता पापालकुन ओप्कुंचि मनसु मार्सकुंचि बापतिस्मा येतानयते, पेन मीवा पापालकुन मापि कीता.”
- 5 इद केंजसि पूरा यहुदिया राज्येमते, येस्सलेम सहरते मंदना लोकुल्क ओनगा वातुर, वासि ओरा पापालक ओप्कुंचि, ओनहेंदाल योर्दन बेरेटे बापतिस्मा येतकुत्तुर.
- 6 योहान लोटापेटा बूराते तयार कीता कपडिं केरसि तोल्दा पट्टा नडिक तासकुनुंदुर. ओर गोल्लाबामां आनि तेने इवे तिडि तिनुंदुर.
- 7 “नाकन्ना सक्तिमंतुड नावा पज्जोटाल वासंतोर. नना ओना मुन्ने वंगिसि, ओना बूटकुना नोंडेन लेहना लायकगुडा हिल्लेन.
- 8 नना मीक एतोनि बापतिस्मा हीतन गानि ओर मीक पवित्र आत्माते बापतिस्मा हियानुर,” इंचि योहान वेहुंदुर.

येसु बापतिस्मा येतमळ
(मत्तयाल 3:13-17; लूकाल 3:21-22)

- 9 अव रोजकुने येसु गालिल एरियाता नासरेत सहरताल वासि, योर्दन बेरेटे योहानुनाहेंदाल बापतिस्मा येतकुत्तोर.
- 10 येसु बस्के अयते एताल पलाते वातोर, अस्केने मब्बु बैय्यरा आयानद आनि पवित्र आत्मा पावरेम पिट्टेलेसी ओनपोरी रेयानद हळतोर.
- 11 अच्चोटेन मब्बुनाल, “निमे नावा पावरमगल्ला मर्रिन आंदिन. नीहेंदाल नना वेल्लेने कूस मंतन,” इंचि उंदि अल्किर केंजावाता.

पेनदा दूतां येसुना सेवा कियमळ

(मत्तयाल 4:1-11; लूकाल 4:1-13)

12 अद आता पजा पेनदा आत्मा बिराना येसुन बय्लि जेगाताहेके लोहता.

13 अगा नल्पै रोजकु केडा जिवरासिना नड्डुम मननेके, देय्यम येसुनगा वासि, ओना पट्ट हळता. पजा पेनदा दूतां वासि ओना सेवा कीतां.

येसु पेनदा पोल्लें वेहालय सुस्त्र कियमळ

(मत्तयाल 4:12-17; लूकाल 4:14-15)

14-15 हेरोद राजाल योहानुन जेलते वाटता पजा, येसु गालिल एरियाते वासि, “पेन इत्ता वेला पुरागा आसि, पेनदा राज्येम दग्गेके एव्ता. अदुनहाटीं मिमेट मनसु मार्सकुंचि पेनदा बेसता कबुरपोर्रो विस्वासम ईरट,” इंचि वेहालय दलगतोर.

येसुना मोदाटा सिस्युल्कु

(मत्तयाल 4:18-22; लूकाल 5:1-11)

16 येसु गालिल समुद्रम ओड्डु पीसि होननेके सिमोनन आनि ओना तम्मुर अंदरियन हळतोर. ओर जिम्मां पिय्यानोर आताहाटीं, समुद्रमते ओल्लां वाटसि जिम्मां पीसेक मत्तुर.

17 अस्के, “नावा पज्जो वट, नना मीकुन मनकालोर्कुन नहगा तायानोर कीतन,” इंचि येसु ओर्कुन इत्तोर.

18 अस्के ओर, बिराना ओरा ओल्लां अग्गेन होळसि ओना पज्जो होत्तुर.

19 येसु इंकिच्चो मुन्नेळक होत्तारित्ते जब्दिना मर्कु याकोब आनि ओना तम्मुर योहान डोंगाते ओल्लां सवरिचनेके हळतोर.

20 येसु ओर्कुन बिराना केयतस्के, ओर ओरा बाबाल जब्दिन आनि बूतिनोर्कुन अग्गेन डोंगाते होळसि ओना पज्जो होत्तुर.

येसु देय्यम पीतोन बेस कीतोर

(लूकाल 4:31-37)

21 ओर अंतोर कूळसि कपर्नाहूम सहरते होत्तुर. अगा येसु नोमकेम रोजुने दर्मसास्त्रम कराहना लोते होंचि पेनदा पोल्लें कराहलय दलगतोर.

22 येसु पेनदा पोल्लें ओरा दर्मसास्त्रम कराहना गुस्लुकुनलेसीं आयो गानि अदिकारम मत्ताप कराहतोर. अदुनहाटीं ओना कराहमळतुन केंजसि लोकुल्क वेल्ले इचंत्रम आतुर.

23 अदे दर्मसास्त्रम कराहना लोते वरोर देय्यम पीता मनकल मत्तोर.

24 ओर येसुन हूळसि, “निमे बोन आंदिनो नाक एरपाटे, निमे नासरेत सहरता येसुन, पेनदा पवित्र मनकन आंदिन. मातोनि नीकु बाता कबळ? माकुन नासडेम कियालय वातिना?” इंचि वरगेयसि इत्तोर.

25 अद केंजसि, “निमे चुपचाप मन, ओनागटाल पलाते पेयसा,” इंचि येसु जोरसे गदारिचतोर.

26 अस्के आ देय्यम ओन गजा-गजा ऊपसि जोरसे वरगेयसेके ओना लोप्पोटाल पेय्सि होत्ता.

27 अदुन हूळसि अगा मत्तोर अंटोर इचंत्रम आसि, वरोंक-वरोर इल्हा वळकालय दलगतुर, “इद बसोंटा पोल्ले, इद अयते पूना बोदा आंदु, ईर अदिकारमते देय्याल्कुन ओना लोप्पोटाल पेय्सि होंटु इंचि आदेस हीतोर, अव ईना पोल्ले केंजसेक मंतां.”

28 इल्हा येसु अगा कीता गटनना बारेमते पूरा गालिल एरिया आनि सुट्टु-मट्टु मत्ता अन्नि नाहकुने तेळियसि होत्ता.

येसु वेल्लेटोर्कुन बेस कियमळ

(मत्तयाल 8:14-17; लूकाल 4:38-41)

29 येसु आनि ओना सिस्युल्कु सिमोन, अंदरियल, याकोब, योहान दर्मसास्त्रम कराहना लोताल बिराना पलाते पेय्सि सिमोन आनि अंदरियना लोन होत्तुर.

30 अगा सिमोनना पोरड एळकि वासि मींडसि मत्ता. इद पोल्ले अगा मत्तोर बोरो येसुंक वेहतुर.

31 येसु होंचि दाना कय पीसि तेहतोर. अस्के दाना एळकि रेय्सि, अद ओरा सेवा कियालय दलगता.

32 पजा पोळद होंचि, लोकुल्क बिमारते मत्तोर्कुन, देय्याल्क पीतोर्कुन अंटोर्कुन येसुनगा पीसि वातुर.

33 पूरा सहरतोर येसु मत्ता लोता गलमातगा जमा आतुर.

34 येसु तीरतीरकुना बिमार्क मत्तोर वेल्लेटोर्कुन बेस कीतोर, देय्याल्क पीसि मत्ता वेल्लेटोर्कुना देय्याल्कुन पेचाहिचि गेदुमतोर. अव ओन एरपाट कियुंदु, अदुनहाटीं ओर अबुन वळका हिया हिल्लोर.

येसु वरोरे पारतना कियमळ

(लूकाल 4:42-44)

35 येसु इंकुंदि रोज हक्केरेने बय-बय आयानेके तेदसि बोरे हिल्वगा होंचि पारतना कीतोर.

36 सिमोन आनि ओना दंटातुर तेदता पजा येसुन पहकालय दलगतुर.

37 पहकिसि-पहकिसि दोर्किच्चि, “नीकुन अंटोर पहकसेक मंतुर,” इंचि येसुन इत्तुर.

38 अस्के येसु ओर्कुन इल्हा इत्तोर, “मनम पकापीसि मत्ता नाहकुने दाकोम, आ नाहकुने पेनदा पोल्लें वेहमळ गावाले. इद कबळताहाटीगे नना वातन.”

39 अल्हा ओर पूरा गालिल एरियाते तिरियसेके, ओरा दर्मसास्त्रम कराहना लोहकुने होंचि पेनदा पोल्लें वेहचेके, देय्याल्क पीसि मत्तोरगटाल देय्याल्कुन पेचाह्चि गेदुमसेके होत्तोर.

येसु कुस्ट रोगमतोन बेस कियमळ

(मत्तयाल 8:1-4; लूकाल 5:12-16)

40 अल्हा होंचेके मननेके वरोर कुस्टरोगम आता मनकल येसुनगा वासि, ओना कालकुनपोर्री अर्सि, “निमे इन्कुत्ते नाकुन बेस किया परीतिन,” इंचि येसुन विनंति कीतोर.

41 येसुंक ओनपोर्री दया वाताहेंका कय मुन्नेळक कीसि ओन इट्सि, “निमे बेस आयगोम इंचि नावा मनसु मंता. निमे बेस आम” इंचि इत्तोर.

42 इत्ता इनुडे ओना कुस्टरोगम होत्ता ओर बेस आतोर.

43-44 अस्के, “हळा! इगे जर्गतद बोर्के वेहमा. गानि निमे होंचि मीवा पेर्माक हृप्सा. कुस्टरोगमताल निमे बेस आता गवाइ इंचि मूसाल वेहता मोक्कु हीम. अदुन हळसि निमे बेस आतिन इंचि लोकुलकुंक एरपाट आंता,” इंचि येसु ओन्क गट्टिगा वेहतोर.

45 गानि आ मनकल अगटाल पेय्सि अद पोल्ले अंटोर्क वेहालय दलगतोर. अस्के, “अंटोर्क तेळियता, नाकुन हळसि लोकुलक मंदांनां-मंदां वांतुर,” इन्कुंचि येसु कळमता नाहकुने होना हिल्लोर. ओर अल्किर हिल्वा जेगाते मत्तोर, अगागुडा लोकुलक नालुं-मूलानाल ओना जाडा पीसि होत्तुर.

2

लकवा बिमारतोन बेस कियमळ

(मत्तयाल 9:1-8; लूकाल 5:17-26)

1 कोन्नि रोजकु आतारित्ते येसु कपर्नाहुम सहरते मल्लिस वातोर, ओर लोन मंतोर इंचि लोकुकुकुंक तेळियसि होत्ता.

2 अस्के लोतागा इच्चोर वेल्ले लोकुकुकुंक जमा आतुर गदा, गल्माते नित्तालय जेगागुडा मनाहिल्ले. येसु ओर्कु पेनदा पोल्लें कराहतोर.

3 अद वेलाते नालुर मनकालोर वरोर लकवा बिमारतोन पीसि येसुनगा वातुर.

4 गानि वेल्ले गर्दि मत्ताहाटीं ओर येसुनगा ओया पराहिल्लुर. अय्ते ओर लोतपोरीं कटुल पियानच्चो बोंगा कीसि लकवा बिमारतोन येसुनगा रेहतुर.

5 येसु ओरा विस्वासमतुन हळसि, आ लकवा बिमारतोन, “कोको, नीवा पापालक मापि आतां,” इंचि इत्तोर.

6-7 अस्के अगा उद्दिसि मत्तोर लोप्पोटाल इच्चुर दर्मसास्त्रम कराहना गुस्लक, “ईर इल्हा बारि वळकसंतोर? ईर पेनदा अपमानम कींतोर. पेन तप्पा इंका बोरे पापालकुन मापि किया पर्स्,” इंचि ओर-ओरे मनसुने विचारम कियालय दल्गतुर.

8 ओर-ओरे विचारम कियानद येसु ओना मनसुने बिराना एरपाट कीसि, “मी मनसुने मिमेट इसोटा विचारम बारि कीतिर?

9 बद अलकगा मंता? लकवा बिमारतोन, ‘नीवा पापालक मापि आतां इंचि इनमळा हिलाकोटे, नीवा कटुल तेहकुंचि ताका’ इनमळ?” इंचि पूसकीतोर.

10 पजा, “गानि मनकना रूपमते पुटतोन नाकु, ई बूमिपोरींटा पापालक मापि कियाना अदिकारम मंता इंचि मीक तेळियोना?” इंचि इत्तोर. पजा आ लकवा बिमारतोन,

11 “नना नीकु वेहासेके, तेदसि नीवा कटुल तेहकुंचि लोन होन,” इंचि इत्तोर.

12 इत्ता इनुडे ओर तेदसि कटुल पीसि अंतोर मुन्नेटाल पेय्सि होत्तोर. अदुन हळसि अंतोर इंचत्रम आतुर. “इल्हा मोमोट बस्केने हळा हिल्लोम” इंचि पेनदा स्तुति कियालय दल्गतुर.

येसु लेविन केयमळ

(मत्तयाल 9:9-13; लूकाल 5:27-32)

13 येसु मर्रा उंदि मल्का समुद्रम ओड्डुंक होत्तोर. वेल्लेटुर लोकुकुकु ओनगा वातुर अस्के येसु ओर्कु पेनदा पोल्लें कराहलय दल्गतोर.

14 कराहमळ आतस्के अगटाल होननेके अल्पिना मर्रि लेवि, कर वसुल कियेना नाकातगा उद्दिदिस मत्तद हळतोर. हळसि ओन, “नावा पज्जो वा,” इंचि इत्तस्के ओर तेदसि ओना पज्जो होत्तोर.

15 पजा येसु लेविना लोन गाटो तिंचेके मननेके वेल्लेटुर कर वसुल कियानोर आनि पापि लोकुल्क वासि येसु आनि ओना सिस्स्युल्कनतोनि गाटो तिनालय उदतुर. ओरव्टे वेल्लेटुर येसुन विस्वासम कीतोर मत्तुर.

16 कर वसुल कियानोरतोनि आनि पापि लोकुल्कनतोनि येसु गाटो तिनानद परिसिल्क आनि दर्मसास्त्रम कराहना गुस्ल्क हळतुर. हळसि, “कर वसुल कियानोरतोनि आनि पापि लोकुल्कनतोनि येसु गाटो बारि तितोर?” इंचि ओर येसुना सिस्स्युल्कन पूसकीतुर.

17 अद केंजसि येसु ओर्कुन इल्हा इत्तोर, “बिमर हिल्वोर्कुंक डाक्टरना अक्सरम मन्नो गानि बिमर मत्तोर्कुंक डाक्टरना अक्सरम मन्ता. नना नीतिमंतुल्कन केयालय आयो गानि पापि लोकुल्कन केयालय वातन,” इंचि इत्तोर.

18 बापतिस्मा हियना योहानुना सिस्स्युल्क आनि परिसिल्क ओक्कापोद्दु मनुंदुर. अय्ते इच्चुर लोकुल्क वासि, “योहानुना सिस्स्युल्क आनि परिसिल्क ओक्कापोद्दु मनुंतुर. गानि नीवा सिस्स्युल्कु मन्नु. अल्हा बारि?” इंचि येसुन पूसकीतुर.

19 अस्के येसु ओर्क इल्हा वेहतोर, “मरमिन पेडल मरमिं वाता हेडमितोरतोनि मननेके ओर्कु ओक्कापोद्दुना अक्सरम मन्तना? मन्नो. बदवेरादाका मरमिन पेडल ओरतोनि मन्तोर अदवेरदाका ओर ओक्कापोद्दु मन्नु.

20 गानि मरमिन पेडल ओरागटाल लक्कु आयाना रोजकु वायनुं, अस्के ओर ओक्कापोद्दु मनानुर.”

21 “बोरे आयिर पडना कप्पिड हर्ते, दानकु पूना कप्पिडता गंडा अंटा वाट्टिस कुट्टोर. ओक्कला ओर अल्हा कियानय्ते अंटा वाटता पूना कप्पिडता गंडा इगका होंचि पळाना कप्पिडतुन इंकिच्चो हरहंता.

22 अल्हेने पूना अंगुर पानकमतुन पळाना तोलपुर्कति बोरे दोस्सर, अल्हा दोसते अद अंगुर पानकम, पळाना तोलपुर्कतुन हराहिचि पोंगिस दांता. आनि तोलपुर्कागुडा नासडेम आंता. अदुनहाटीं पूना अंगुर पानकम, पूना तोलपुर्कतिन दोसंतुर,” इंचि येसु इत्तोर.

नोमकेम रोजुना मालक येसु आंदुर
(मत्तयाल 12:1-8; लूकाल 6:1-5)

23 उंदि नोमकेम रोजुने येसु आनि सिस्स्युल्क पोलाल्कुनाल होंचेके मत्तुर, होननेके ओना सिस्स्युल्क हेनकु नल्सि तिचेक मत्तुर.

24 परिसिल्क अदुन ह्ळसि, “बद कबळ अय्ते नोमकेम रोजुने कियमळ नियम परकारम ओज्जोनो, अदे कबळ नीवा सिस्स्युल्क बारि कीसंतुर?” इंचि येसुन इत्तुर.

25 अस्के येसु ओर्कुन, “दाविदुंक आनि ओना दंटातोर्कुंक कर्वेस्तस्के ओर बतल कीतोर मिमेट हदवा हिल्लिरा?

26 अबियातार इनानोर पेद्दा पेर्मल मननेके दाविद पेनदा लोते होळियसि पेनदुक मोळकता हारिन तित्तोर, ओना दंटातोर्कुंकगुडा हीतोर. अव हारि तिनमळ इत्ते दर्मसास्त्रम परकारम विरोदमते मत्ता. अव हारि सिराप पेर्मालोर्क तप्पा इंका बोरे तिना पर्स्,” इंचि ओर्कुन इत्तोर.

27 मर्रा ओरतोनि, “नोमकेम रोजु मनकनाहाटीं कीसि मंता, मनकल नोमकेम रोजुनाहाटीं आयो.

28 अदुनहाटीं मनकना रूपमते पुटतोन नना, नोमकेमता रोजुना मालकगुडा आंदुन,” इंचि येसु इत्तोर.

3

वतसि होत्ता कयदोन येसु बेस कियमळ
(मत्तयाल 12:9-14; लूकाल 6:6-11)

1 येसु मर्रा उंदि मल्ला दर्मसास्त्रम कराहना लोते होत्तोर. अगा वरोर कय वत्सोत्ता मनकल मत्तोर.

2 नोमकेम रोजुने येसु ओन बेस कियानय्ते ओन तप्पुने पीकोम इंचि इच्चुर लोक्कुलक ह्ळसेक मत्तुर.

3 “अंतोरा मुन्ने वासि नित्ता,” इंचि येसु, कय वत्सोत्तोन इत्तोर.

4 पजा, “नियम परकारम, नोमकेम रोजुने बेस कियमळ मंचिदा, कराब कियमळ मंचिदा? हिलाकोटे पिसागोटते मंचिदा, हक्कते मंचिदा?” इंचि पूसकीतोर. गानि ओर चुपचाप मत्तुर.

5 ओर्क बोर्के जीवा नोय्यो इंचि कन्कुंचि येसुक दुक्कम वासि, ओर अंटोरहेके होंगुने हळतोर. पजा, “नीवा कय मुन्नेळक हहा,” इंचि आ कय वत्सोत्तोन इत्तोर. ओर कय मुन्नेळक हाहतस्के ओना कय बेस आता.

6 पजा परिसिल्क अगटाल पलाते पेय्सि, हेरोद राजाना लोकुकुकुंक होंचि कलियतुर. कलियसि येसुन बल्हा हळकना? इंचि येसुना विरोदमते वळ्ळुकुत्तुर.

वेल्लेटुर लोकुल्लक येसुना पज्जो वांतुर

7-8 येसु ओना सिस्युल्लुकुन पीसि अगटाल पेय्सि समुद्रमहेके होत्तोर. येसु कियाना इचंत्रमता कबाहक केंजसि गालिल एरिया, यहुदिया एरिया, येस्सलेम सहर, इदुमिया एरिया, सू, सिदोन इनना सहरकुनाल, योर्दन बेरेटा हब्बेटाल, आनि पकापीसि मत्ता नाहकुनाल वेल्लेटुर लोकुल्लक ओनगा वातुर.

9-10 बिमार मत्तोर्कुन वेल्लेटोर्कुन येसु बेस कीतोर. अदुनहाटी बिमार लोकुल्लक येसुन इट्टानाहाटी वरोंक-वरोर दोबसेके वासेक मत्तुर. ओरपोर्री अर्कांटा लक्कु मंदना इंचि, “उंदि सिन्ना डोंगा नाहाटी तयार कीम्दु,” इंचि येसु ओना सिस्युल्लुकुंक वेहतोर.

11 देय्याल्लक पीसि मत्ता लोकुल्लक येसुन बस्के अये हळुंदुरो अस्के, “निमे पेनदा मर्रिन!” इंचि वरगेयसि ओना मुन्ने हिळ्ळ अर्स्दुर.

12 गानि येसु मात्रम, “नावा बारेमते बोर्के बतले वेहमट,” इंचि आ देय्याल्लुकुंक गट्टिगा ह्कुम हीतोर.

येसु पन्नेंड मंदितुन सिस्युल्लक इंचि निलाहमळ
(मत्तयाल 10:1-4; लूकाल 6:12-16)

13 पजा येसु गट्टापोर्री होत्तोर. आ मंदिताल येसु बोर्कुनयते कोरतोर, ओर्कुन ओनगा केयकुत्तोर.

14-15 ओर ओनतोन मनालय, पेनदा बेसता कबुर वेहनाहाटी लोहालय इंचि पन्नेंड मंदितुन पेरतोर. पेरसि ओर्कु प्रेरितुल्लक इंचि पोरोल दोसतोर. ओर्क देय्याल्लक गेदमना अदिकारम हीसि निलाहतोर.

16 ओरा पोरोली इल्हा मंतां: सिमोन, ईनकु येसु पत्रु इंचि पोरोल दोसतोर,

17 जब्दिना मर्क याकोब आनि ओना तम्पुर योहान. ईर इब्बुर्कुन बोनेर्गैस इंचि येसु पोरोल दोसतोर, इत्ते गर्जना कियानोर इंचि अर्तम.

18 अंदरियल, पिल्लिपु, बरतलमय, मत्तयाल, तोमल, अल्पिना मर्रि याकोब, तद्दि, सिमोन कनानि,

19 आनि येसुन दोकाते पीसि हियानोर इस्कारियोत नाटेना यहुदल.

येसु आनि बेलजाबुल इनना देय्याल्कुना मुक्यल
(मत्तयाल 12:22-32; लूकाल 11:14-23)

20 पजा येसु उंदि लोन होत्तोर. अगागुडा इच्चोर वेल्ले मंदि जमा आतुर गदा, येसुंक, ओना सिस्स्युल्कुंक गाटो तिनालयगुडा वेला दोर्काहिल्ले.

21 येसु पिसा-पिसा कीसंतोर इंचि लोकुल्कुनहेंदाल ओना लोतोर केंजसि ओन लोन तायालय होत्तुर.

22 येस्सलेमताल वाता दर्मसास्त्रम कराहना गुस्लुकु, येसु देय्याल्कुन गेदुमसेके इंचि, “ईना लोप्पो ‘बेलजेबुल’ इनना देय्याल्कुना मुक्यल होळियसि मंता, दाना बलमते ओर देय्याल्क तेंडांतोर,” इंचि इत्तुर.

23 अदुनहाटीं येसु ओर्कुन दग्गेरा केय्सि ओर्कु वेसुडिते वेहातोर. “देय्यम दाना देय्याल्कुन बल्हा तेंडा परांता?

24 ओक्कला, उंदि राज्येमते मनानोरा लोप्पो वरोनद-वरोंक अर्काकोटे अद राज्येम निल्ला परांतना? बस्केने निल्ला पर्री.

25 अल्हेने उंदि लोता लोप्पो वरोनद-वरोंक अर्काकोटे अद लोन गाट्टिगा मन्नो.

26 अदुनहाटीं देय्यम दाना दंटाता देय्याल्कुना विरोदमते नितते, अबुना राज्येम बल्हा नित्तंता? नित्तापर्री, गानि नासडेम आंता.

27 बोरे आयिर! वरोर ताकतवर मनकना लोते होळियसि ओना सामानतुन दोंगा कियना इत्ते, मोदाला आ ताकतवर मनकन दोहचि वाटतेन दोंगा किया परांतोर.

28 नना मीक निजम वेहांतन, मनकालोरा अन्नि पापाल्कुन, ओर कीता अपमानमतुन पेन मापि किय्यार.

29 गानि पवित्र आत्माता अपमानम कीते, ओर बोरे आयिर, ओन्क बस्केने मापि हिल्ले. असोंटा तप्पु कीता लोकुल्क बस्केळ्क पापमता दोसेमतेन मनंतुर,” इंचि वेहतोर.

30 अल्हा बारि वेहतोर इत्ते, “ओनालोप्पो देय्यम मंता,” इंचि दर्मसास्त्रम कराहना गुस्लुकु ओन इत्तुर.

येसुना यावल आनि तम्मुह्क
(मत्तयाल 12:46-50; लूकाल 8:19-21)

31 पजा येसुना यावल, ओना तम्मुह्क ओर मत्ता लोतगा वातुर. ओर लोता पलाते नित्तिसि येसुन केयट इंचि लोहतुर.

32 लोकुल्क येसुना सुट्टु उद्दिदिसि मत्तुर. अस्के, “नीवा यावल, नीवा तम्मूहक, हेलाहक पलाते एदुर हळसेक मंतुर,” इंचि ओर वेहतुर.

33 अयते, “बद नावा यावल, बोर ना तम्मूहक?” इंचि येसु ओर्कुन इत्तोर.

34 अस्के ओना सुट्टु उद्दिदिसि मत्तोरहेके हळसेक, “ईर नावा यावल, ईर ना तम्मूहक आंदुर.

35 बोर अयते पेनदा इच्चा परकारम ताकंतुरो ओरे नावा तम्मुर, हेलड आनि यावनलेसी दग्गेटोर आंदुर,” इंचि वेहतोर.

4

विज्जां वीताना कास्तकरि मनकना वेसुडि
(मत्तयाल 13:1-9; लुकाल 8:4-8)

1 येसु मरुदि मल्का गालिल समुद्रम ओड्डुनगा होंचि पेनदा पोल्ले कराहलय दलगतोर. अस्के ओनगा वेल्लेदुर लोकुल्क जमा आताहेका ओर उंदि डोंगा एक्किस उदतोर. लोकुल्क बारे बूमिपोरी नित्तिसि मत्तुर.

2 अस्के ओर वेल्लेन पोल्ले लोकुल्कुं वेसुडि वेहासेक कराहतोर. उंदि वेसुडि इल्हा मत्ता.

3 “केंजट, वरोर कास्तकरि मनकल विज्जां वीतालय पेयस्तोर.

4 ओर वीतनेके इच्चुं विज्जां हरदगा अरतां, अस्के अवुन पिट्टें वासि पेर्सि तित्तां.

5 इच्चुं विज्जां बंडाना गेर्सेपोरी अरतां. अगा तोळि एक्को हिलुवादानकु आ विज्जां बिराने मोलियतां. गानि हिहकु लोप्पोळ्क होनवाहेका पोळ्द पेयस्तस्के अव वत्सि हासोत्तां.

6 गानि हिहकु लोप्पोळ्क होनवाहाटीं पोळ्द पेय्सि वेल्ले एद्दि आतस्के अव वतसि कर्विसि होत्तां.

7 इंका इच्चुं विज्जां हाहकुना पोदाने अरतां. हाहकुना पोदां इरगा बेर्सि, अव विज्जन बेर्सां हिया हिल्ले, अदुनहाटीं पंटा पेयसा हिल्ले.

8 इच्चुं विज्जां बेसता जेगाते अरतां. अव बेस मोलियसि, बेर्सि बेस पंटा पेयस्ता. बगा मुपै अंताल्क, बगा अरवै अंताल्क, बगा नूर अंताल्कुना पंटा पेयस्ता,” इंचि वेसुडि महतोर.

9 पजा मर्रा ओर्कुन, “बोर्कु केंजालय केव्क मंतां ओर केंजट,” इंचि येसु इत्तोर.

वेसुडिं वेह्चि वळकाना कारनम येसु वेहंतोर
(मत्तयाल 13:10-17; लूकाल 8:9-10)

10 येसु वरौरे मत्तद हळसि अगा मत्तोर लोप्पोटाल इच्चुर लोक्कुलक आनि ओना पन्नेड सिस्स्युल्लुकु ओनगा होंचि “ई वेसुडिता अर्तम वेहा,” इंचि येसुन इत्तुर.

11 येसु ओर्कुन, “मीक अयते पेनदा राज्येमता बारेमता मर्ममतुन एरपाट कीकुनालय बुद्दिदे मंता, गानि पलातोर्कुंक बारे इद मर्मम तेळियालय वेसुडिने वेहा पीता.”

12 बारित्ते,

“ओर हळळ अयते हळंतुर, गानि अदुन एरपाट किय्युर.

केंजुड अयते केंजांतुर, गानि अद ओर्क तेळियो.

ओक्कला ओर एरपाट कीकुंचि मत्ते, तेळियागोटकुंचि मत्ते,

पेनदागा मल्लिस वायेर, पेन ओर्कुन मापि कियवळ,”

इंचि इत्तोर.

कास्तकारि मनकना वेसुडिता अर्तम
(मत्तयाल 13:18-23; लूकाल 8:11-15)

13 मर्रा येसु ओर्कुन इल्हा इत्तोर. “मीक इद वेसुडिता अर्तम तेळिया हिल्लेना? इदे मीक तेळियाकोटे इंका वेरे वेसुडिं मीक बल्हा तेळियानुं?

14 इगो वीतानोर इत्ते पेनदा पोल्लेतुन वेरेतोर्क वेहानोर आंदुर.

15 इच्चुर लोक्कुलक विज्जां अरता हर्दा जेगातसंतोर आंदुर. ओर पेनदा पोल्लेतुन केंजांतुर, केंजतारित्ते देय्यम बिराना वासि ओर केंजतवुन तेंडसि पोहंता.

16 विज्जां अरता बंडाना गेर्से जेगातसंतोर बोर इत्ते, बोर अयते पेनदा पोल्लेतुन केंजसि कुसिते बिराने ओप्कुंतुर.

17 गानि ओरा मनसुने पेनदा पोल्लेता हिह्कु गट्टि पळ्ळावाहाटीं कोन्नि रोजके विस्वासमते मनांतुर. पेनदा पोल्लेताहाटीं तिप्पल्क, कस्टाल्क वाते विस्वासमताल ओर बिराना लक्कु आंतुर.

18 विज्जां अरता हाह्कुना पोदाना जेगातसंतोर बोर इत्ते, बोर अयते पेनदा पोल्ले केंजांतुर,

19 गानि सम्सारमता रंदि, दनमता आस्ति, दिसतवंता गावाले इत्ता मनसु, इवन्नि मत्ताहाटीं पेनदा पोल्लेतुन ओनालोप्पो बेर्सा हिय्यो. पजा अद पोल्लेहेंदाल ओन्क बतल पायदा आयो.

20 बोर अय्ते पेनदा पोल्लेतुन केंजसि, ओप्कुंचि बेस पायदा तरांतोर, ओर इत्ते, विज्जां अरता बेसता जेगातसंतोर आंदुर ओर मुप्यै अंताल्क, अरवै अंताल्क आनि नूर अंताल्क इल्हा पलांचंतोर,” इंचि इत्तोर.

वेडसिता वेसुडि
(लूकाल 8:16-18)

21 येसु मरुंदि वेसुडि वेहतोर. “बोरे आयिर वेडसि निरिच्चि गंजुना हिळु मुच्चोर, कटुल हिळुगुडा इर्रो. गानि वेल्लु दिसगोम इंचि दान उंदि दीसोडिपोर्रो इर्रंतोर.

22 मक्किस मत्तव अन्नि दिस्सि अर्राकोटा मन्नो, आनि मर्ममते मत्तव बवे पलाते अर्राकोटा मन्नो.

23 बोर्कु केंजालय केव्क मंतां ओर केंजट,” इंचि येसु इत्तोर.

24 मर्रा येसु ओर्कुन इल्हा इत्तोर. “मिमेट बेस उसारते केंजट, बद कोलताते मिमेट हीतिरो, अदे कोलताते मीकु हियमळ जर्गता, इंका दानकन्ना एक्कोगुडा हियमळ जर्गता.

25 बारित्ते, बोनगा अय्ते मंता, ओन्क पेन इंका हीता. गानि बोनगा अय्ते हिल्ले, ओनगा मत्तदुनगुडा पेन वापस एतकुन्नार,” इंचि इत्तोर.

विज्जां बेर्समळ

26 मर्रा येसु इल्हा वेहतोर. “पेनदा राज्येम इल्हा मंता, वरोर मनकल ओना नेलिते विज्जां वीतंतोर.

27 ओर नर्कळ्क मीडंतोर, पोद्दला तेल्विते मनंतोर. अद विज्जा मोलियसि बेर्सेकेन दांता. अद विज्जा बल्हा मोलियता, बल्हा बेर्सता इत्तद ओनकु तेळियो.

28 बूमि दानद अदे पंटातुन पंडागोटंता. अद बल्हा इत्ते मोदाला मोल्का मोलियंता, कर्रे बेर्सता, पोट्टक वांता, हेन्नु पेय्सि पेडेक निडंतां.

29 गानि बस्के अय्ते पेडेक मुदरंतां अस्के नेलिता मालक पंटा कोतक वाता इंचि हेटेळ पीसि कोय्यंतोर.”

पेनदा राज्येम आवाल्कुना पेडेतसोटद
(मत्तयाल 13:31-32,34-35; लूकाल 13:18-19)

30 मर्रा येसु ओर्कु इल्हा वेहतोर, “पेनदा राज्येम बल्हा मनंता इंचि वेहकन? बद वेसुडि वेह्चि तेल्लिचकन?

31 पेनदा राज्येम आवाल्कुना उंदि पेडेतसोंटद आंद. अद बूमिपोर्रो वीततस्के, अन्नि पेडेकुंकन्ना सिन्ना पेडे मनंता.

32 गानि अद बेर्सतस्के अगा मनना अन्नि कुसिर कायाना मराकुंकन्ना पेद्दा मरा आंता. दाना पंगां पोळ्गुंक-पोळ्गु बेर्सि, पिट्टें इंका नीडाते गूडां किया परांतां,” इंचि इत्तोर.

33 येसु इसोंटव बच्चुगो वेसुडिं वेहिचि, ओर्क पेनदा पोल्लें तेळियानाल वेहुंदुर.

34 वेसुडि वेहाका येसु ओर्कु बतले वेहाकोंदुर. गानि सिराप ओना सिस्स्युल्क मत्तस्के अव वेसुडिना अर्तम ओर्क तेळियागोट्टिस वेहुंदुर.

येसु वळि दुमारमतुन आपंतोर

(मत्तयाल 8:23-27; लुकाल 8:22-25)

35 अद रोज पोळद होनना वेलाते, “मनम हब्बेटा बाजुंक दाकोम दट,” इंचि येसु ओना सिस्स्युल्कुन इत्तोर.

36 ओना सिस्स्युल्क अगाटा मंदितुन अगोन होळसि, येसु उदिदस मत्ता डोंगाते उदिदस होनालय पेयसतुर. ओरा पज्जो इंकिच्चुं डोंगांगुडा पेयसतां.

37 अस्के उंदि पेद्दा वळि-दुमारम वाता. पेद्दा-पेद्दा तळां डोंगाक दल्लिसि एर निंडालय दल्लगता.

38 गानि येसु डोंगाता पज्जोटा बाजुंक होंचि मेत्तापोर्रो मीडसेक मत्तोर. अस्के सिस्स्युल्कु येसुन तेहचि, “गुरु! मनम नासडेम आसि होनिनागानि नीक्कु बतल पिकिर हिल्लेना?” इंचि इत्तुर.

39 अस्के ओर तेदसि, वळि-दुमारमतुन आनि समुद्रमतुन, “आगा, चुपचाप मन” इंचि गदरिचतोर, अस्के वळि-दुमारम मगिसि, अगा पूरा सांत आता.

40 अस्के येसु सिस्स्युल्कुन, “मिमेट बारि वेरियंतिर? मीक्कु गिच्चचोगुडा विस्वासम हिल्लेना?” इंचि इत्तोर.

41 ओर इरगा वेरियसि, “ईर बोर आंदुर? वळि, समुद्रमगुडा ईना पोल्ले केंजंता,” इंचेके ओर-ओरे वळककुत्तुर.

5

देय्यम पीतोन बेस कियमळ

(मत्तयाल 8:28-34; लुकाल 8:26-39)

1 अस्के ओर समुद्रमता हब्बेटा बाजुंक मनना गिरासेन इनना एरियक एव्तर.

2 येसु डोंगाताल रेयतस्के वरोर देय्यम पीता मनकल तापळन बोग्ळाताहेंदाल वासि येसुंक कलियतोर.

3-4 ओन बच्चुंगो मल्कां बेडिने, गोल्सुकुने दोहचि वाटतुर, गानि ओर बेडिन उराहचि पोहतोर, गोल्सुकुन नेम्हाचि पोहतोर. ओन बोरे आपा पराहिल्लुर. ओर तापळानेन मनुंदुर, ओन बोरे गोल्सुकुने दोहा पराकौंदुर.

5 ओर नर्का-पिय्यल तापळाने, गुट्टाने तिरियसेक वरगेयसेक मनुंदुर. ओनद ओरे बंडाने कोहककुंचि नोप्पि कीकुंनुंदुर.

6 ओर लक्कुटाले येसुन हळसि, विच्चि वासि ओना काल्क मोळ्कतोर.

7-8 अस्के, “ओनागटाल पलाते पेय्सा,” इंचि येसु आ मनकन पीता देय्यमतुन इत्तोर. अदुनहाटीं ओर येसुन, “ए अन्निटकन्ना पेद्दा पेनदा मरिं येसु, नातोनि नीकु बता कबळ? निमे नाकुन तकलिप किय्योन इंचि पेनदा ओट्टु तिचि वेहा,” इंचि जोरसे वरगेयसि इत्तोर.

9 मर्रा, “नीवा पोरोल बतल?” इंचि येसु पूसकीतोर. अस्के ओनालोप्पो मत्ता देय्यम, “मोमोट वेल्लेन मंदा आसि मंतोम, इंचि नावा पोरोल ‘मंदा’ आंद,” इल्हा जवाब हीता.

10 ओनालोप्पो मत्ता देय्याल्क, “माकुन इद एरियाताल पलाते गेदुममा,” इंचि येसुन बच्चोरो विनंति कीतां.

11 अद वेलाते गुट्टा पक्काते पद्दिना मंदा मेय्सेके मत्ता.

12 पजा, “माकुन आ पद्दिना मंदाते होनाहीम,” इंचि आ देय्याल्क येसुन विनंति कीतां.

13 अस्के येसु अवन होना वेहतोर अय्ते, आ देय्याल्क ओनागटाल पेय्सि पद्दिना मंदाते होत्तां. अव पद्दिं रोंडु वेयकुनदाका मत्तां. पजा आ पद्दिना मंदा समुद्रम ओड्डुन पोरोटाल हिळ्ळतुक विल्सि समुद्रमते मुळ्गिसि हासोत्तां.

14 अद हळसि पद्दिं मेहानोर विल्सि होंचि, सहरते, पक्का पीसि मत्ता नाहकुने अगा जर्गतद वेहतुर. अस्के आ देय्याल्क पीतोरद बतल आता इंचि लोकुल्क हळालय अगा वातुर.

15 येसुनगा वासि हळतुर अय्ते, देय्याल्क पीसि मत्ता मनकल पुरागा बेस आसि, कपडिं केरिं उद्दिदिस मत्तद ओर्क दिसतोर. अल्हा मत्तद हळसि ओर्क वेरें दल्गता.

16 येसुना कबाहकुन हळतोर अगा बोर अय्ते मत्तुरो ओर, देय्याल्क पीसि मत्ता मनकल बल्हा बेस आतोर, पद्दिंक बल्हा-बतल आता इवन्नि पोल्लें लोकुल्कुंक

वेहतुर.

17 इवन्नि पोल्लें केंजसि, “निमे मा एरियाताल पेय्सि होन,” इंचि लोकुल्क येसुन विनंति क्रियालय दल्गतुर.

18 अस्के येसु होनालय डोंगाते उदसेके मननेके, देय्याल्कुनाल बेस आता मनकल वासि, “नाकुन नीवातोनि वाया हीम,” इंचि येसुन विनंति कीतोर.

19 गानि येसु ओप्कुन्ना हिल्लोर, “सामि नीपोर्रो दया कीसि नीहाटीं बल्हा बतल कीतोरो, लोन होंचि नीवा लोतोरुंक वेहा,” इंचि इत्तोर.

20 अय्ते ओर मनकल अगटाल देकापोलिस एरियाते होंचि, येसु ओनाहाटीं बतल-बतल कीतोरो अव अन्नि पोल्लें वेहालय दल्गतोर. अद केंजसि अंतोर इचंन्रम आतुर.

उंदि मुरतटुन बेस कियमळ

(मत्तयाल 9:18-26; लूकाल 8:40-56)

21 येसु डोंगाते उद्वेदिसि समुद्रमता हब्बेटा ओड्डुंक मर्रा मल्सि होत्तोर. ओन हळसि वेल्लेटुर लोकुल्क ओनगा जमा आतुर. ओर समुद्रम ओड्डुनगा मत्तोर.

22 अस्के दर्मसास्त्रम कराहना लोता वरोर याईर पोरोलतोर अदिकारि येसुनगा वातोर. वासि ओना काल्कुनपोर्रो अर्सिं,

23 “नावा सिन्ना मिथ्यड बेस हिलाका हायनाल आसि मंता. निमे वासि दानपोर्रो कय इरते, अद बेस आसि दाना जीवा पिस्संता,” इंचि विनंति कीतोर.

24 येसु आ अदिकारिनतोनि होत्तोर. ओना पज्जो वेल्लेन मंदि पेय्सि ओना सुट्टु वेल्ले गर्दि कीसि पोरो-पोरो अरालय आयुंदुर.

25 आ गर्दिते पन्नेड वर्सानाल उंदेतीर कप्पिड आयना उंदि मुरतळ मत्ता.

26 अद वेल्लेटुर वैदकुल्कुंक हुपिस्ता. दानगा मत्ता कोत्तांता मार्ता गानि दाना बिमार बेस आयाका एक्कोने आसेके होत्ता. इल्हा अद वेल्लेने तकलिप बोगांचेक मत्ता.

27-28 अद मुरतळ येसुना बारेमते केंजसि मत्ता. दाना मनसुने, “नना सिराप येसुना कप्पिडतुन इट्टिनागानि बेस आंतन,” इंचि इनकुत्ता. अदुनहाटीं गर्दिते येसुना पज्जो वासि ओना कप्पिडतुन इत्ता.

29 इत्ता इट्टुडे दाना कप्पिड आयमळ बंद आसि बिमार बेस आता इंचि दानकु अनपिस्ता.

30 अदे वेलाते येसुंक ओना लोप्पोटाल ताकत पेय्सता इंचि अनपिस्ता. अस्के पज्जो मल्सि, “नावा कपडितुन बोर इटतुर?” इंचि येसु पूसकीतोर.

31 ओना सिस्युलुकु ओन, “गर्दिते लोकुलुक वरोनपोर्रो-वरोर अरानद निमे हळसेक मंचिगुडा, नावा कपडितुन बोर इटतुर? इंचि पूसकीसेके मंतिन,” इंचि इत्तुर.

32 गानि, “नाकुन बोरन्ना इटसि मंदगोम,” इंचि येसु अंटोरहेके हळसेक मत्तोर.

33 अस्के अद मुरतळकु, बेस आतद तेळियताहार्टी, वैर्रेक वनकुसेक येसुनगा वासि ओना कालकुना पोर्रो अर्सि अगा जर्गतद सत्तेम-सत्तेम वेहता.

34 अस्के येसु आ मुर्ताटुन, “पेगिटुना, नीवा विस्वासमे नीकुन बेस कीता. इसोंटा बिमार मर्रा बस्केने वायो, सांतिते होन,” इंचि इत्तोर.

येसु हाता पेगिटुन जीवा अरहमळ

35 येसु अल्हा वळकसेक मननेके, दर्मसास्त्रम कराहना लोता आ अदिकारिना लोताल इच्चुर लोकुलुक वासि, “नीवा मिय्यड हाता, इंदके गुस्न तकलिप क्रियमा,” इंचि वेहतुर.

36 ओर वळकानदुन केंजवाप कीसि येसु आ दर्मसास्त्रम कराहना लोता अदिकारिनतोनि, “निमे वेरियमा, विस्वासम इर्ग,” इंचि इत्तोर.

37 येसु अगटाल पेय्सनेके पन्न, याकोबुन आनि याकोबुना तम्मुर योहानुन ओनतोनि पीकुत्तोर. ओर्क तप्पा बोने ओना पज्जो वाया हिया हिल्लोर.

38 ओर दर्मसास्त्रम कराहना लोता अदिकारिना लोन होत्तस्के अगा लोकुलुक इरगा अळानद, मोत्कुनानद हळतोर.

39 अस्के येसु लोप्पो होळियसि, “मिमेट अडमळ-मोत्कुनमळ बारि कीसेक मंतिर? अद पेगिळ हाया हिल्ले, मीडसि मंता,” इंचि इत्तोर.

40 अल्हा इत्तद केंजसि ओर येसुन कव्त्तुर. गानि येसु ओर अंटोर्कुन पलाते लोहतोर. पेगिटा तल्लुर-बाबोन, ओनतोनि बोर अय्ते मत्तुर ओर्कुन पीकुंचि पेगिड मीडसि मत्ता अर्राते होत्तोर.

41 होंचि अद पेगिटा कयदुन पीसि, “तलिता कुम” इंचि इत्तोर. इत्ते, “पेगिटुना, नना वेहासेक, तेदा!” इंचि अर्तम.

42 अल्हा इत्ता इनुडे, आ पन्नेड वर्साना पेगिड तेदिस ताकालय दल्गता. अदुन हळसि, अगा मत्तोर वेल्लेन इचंत्रम आतुर.

43 “इगे जर्गतद बोर्के तेळिया मनि” इंचि ओर्कु गट्टिगा हुकुम हीतोर. पजा “अद पेगिडक बतलन्ना तिनालय हीम्दु,” इंचि वेहतोर.

6

येसुन ओना संतम नाटेनोरे ओप्कुना हिल्लुर
(मत्तयाल 13:53-58; लूकाल 4:16-30)

1 येसु अगटाल पेय्सि ओना सहरते होत्तोर, ओना सिस्युल्कगुडा ओना पज्जो होत्तुर.

2 नोमकेम रोजुने दर्मसास्त्रम कराहना लोते होंचि पेनदा पोल्लें कराहसेक मत्तोर. वेल्लेटुर लोकुल्क अव पोल्लें केंजसि, “ईर इच्चोर बेस बल्हा वेहासेक मंतोर? ईनकु इच्चोर बुद्धि बगाटाल वाता? ईर अद्बूतामाता कबाहक बल्हा कीसेक मंतोर?”

3 ईर अय्ते मरियमुना मरि वडलल आंदुर, याकोब, योसेस, सिमोन, यहुदल, ईरा दादल आंदुर. इगे मनातोनि उद्दिदिसि मनानव ओना हेलाहके आंदु,” इंचि इनालय दलग्गुर. अदुनहाटीं ओर येसुन ओप्कुना हिल्लुर.

4 अस्के येसु ओर्कुन, “पेनदा कबुरतोंक ओना संतम नाटेने, ओना जीवातोरगा आनि ओना लोन होळसिसि, कळमतव अन्नि जेगाने मान-मर्यादा दोर्कता,” इंचि इत्तोर.

5 अगा येसु बतले अद्बूतामाता कबाहक किया हिल्लोर, सिराप बिमार मत्तोर्कुन इच्चुर्कुन इद्रिस बेस कीतोर.

6 येसुन ओर विस्वासम कियवाहाटीं ओन्क इचंत्रम आता. पजा नार-नार होंचि पेनदा पोल्लें कराहसेके तिरियतोर.

येसु पन्नेंड सिस्युल्कुन लोहमळ
(मत्तयाल 10:1,5-15; लूकाल 9:1-6)

7 उंदि रोज येसु पन्नेंड मंदि सिस्युल्कुन दग्गेरा केयतोर. ओर्कुन इव्वुर-इव्वुर दंटा कीसि, ओर्क देय्याल्क गेदमना अदिकारम हीसि सेवा कियालय लोहतोर.

8-9 अदिकारम हीसि ओर्कु इल्हा वेहतोर, “मिमेट होननेके मीतोनि गाटो आयि, जोरा आयि, कोत्ताना संचि आयि, एककोतव अंगि आयि ओयमट. सिराप कय्दे दुड्डु, कालकुंक हेरपुहक ओम्टु.

10 मिमेट बद लोन अय्ते दांतितो, अगटाल पेय्सनदाका अदे लोते मंटु.

11 बोर अय्ते मीकुन ओप्कुन्नुर, मीवा पोल्लें केंजुर अगटाल पेय्सनेके ओर्क विरोदमते गवाइलेसीं मीवा कालकुना दुम्मु दुल्पट. नना मीक निजम वेहासेक मंतन,

न्यायमता रोजुने आ नाटुक वाता गोसाकन्ना सदोम, गमोरा सहरकुंक वायाना गोसा बच्चोगो तक्को मनंता,” इंचि वेहतोर.

12 अस्के सिस्युल्कु अगटाल होंचि, “मीवा पापालक ओप्कुंचि, मनसु मार्सकुंटु” इंचि लोकुल्कुंक प्रचार कीतुर.

13 देय्याल्क पीतोरगटाल बच्चुंगो देय्याल्कुन गेदुमतुर. बिमारते मत्तोर्कुन निय होकसि बेस कीतुर.

हेरोद राजल येसुन बापतिस्मा हियना योहान इनकुंतोर
(मत्तयाल 14:1-12; लूकाल 9:7-9)

14 येसुना पोरोल अंटोर्क तेळियसि होत्ता. हेरोद राजालगुडा येसुना बारेमते केंजतोर. अस्के ओर इल्हा इत्तोर, “बापतिस्मा हियना योहान हातोरावटेताल मर्ना तेदतोर. अदुनहाटीं ओर इसंटा अद्बूतामाता कबाहक कीसंतोर.”

15 अल्हेने इच्चुर बारे, “पेनदा कबुरतोर एलियल आंदुर,” इंचिच्चुर बारे, “एनकटा पेनदा कबुरतोर लोप्पोटाल बोरन्ना वरोर मंदनुर,” इंचि इत्तुर.

16 गानि हेरोद राजाल इदुन केंजसि, “बापतिस्मा हियना योहानुना तल्ला नना कोय्यागोटतन, ओरे हातोरावटेताल मर्ना जीवाते तेदतोर,” इंचि इत्तोर.

17-18 बारित्ते, हेरोद राजाल ओना तम्मुर पिलिपुना मुत्तो हेरोदियान इरकुंचि मत्तोर. अयते योहान हेरोद राजानगा होंचि, “नीवा तम्मुना मुत्तोन निमे निहगा इरमळ नियम परकारम बेस आयो,” इंचि वेहुंदुर. अल्हा वेहतादान्कु हेरोदियनहाटीं हेरोद राजाल सिपाइल्कुन लोहचि योहानुन जेलने वाटा वेहतोर.

19-20 अयनागानि मोका दोर्कते योहानुन हक्कालय हेरोदियल हळुंदु, गानि अद हक्का परांहिल्ले. बारित्ते योहान नीतिमंतुड, पवित्र मनकल इंचि हेरोद राजाल वेरियुंदुर. अदुनहाटीं ओर जेलते मननेके ओन्क बतल आयामान्नि इंचि ओन कापाळसि इर्दुर. हेरोद राजाल योहानुना पोल्लें केंजसि परेसान आसिगुडा कुसिते केंजुंदुर.

21 उंदि रोज हेरोदियांक मोका दोर्कता. हेरोद राजाल ओना पुटता रोज मंता इंचि ओनगा मनना पेद्दाल्कुन, सिपाइल्कुना अदिकारिल्कुन आनि गालिल राज्येमता लीडकुन बोजनमहाटीं केयतोर.

22 अस्के हेरोदियाना मिथ्यड अगा वासि हेरोद राजाल अल्हेने हेळमितोरा मुन्ने एगरिसि ओर्कुन कूस कीता. अस्के राजाल आ पेगिटुन केय्पि, “नीकु बतल गावाले नाकुन तल्का, नना अद हीतन,” इंचि इत्तोर.

23 अल्हेने, “नावा सगम राज्येमगुडा नीकु हियालय तयार मंतन,” इंचि ओट्टू तित्तोर.

24 अस्के अद पेगिळ दाना यावानगा पलाते होंचि, “बतल तल्ककन” इंचि पूसकीता. अस्के, “बापतिस्मा हियना योहानुना तल्ला तल्का,” इंचि दाना यावल वेहता.

25 गाबरते आ पेगिड हेरोद राजानगा बिराना लोप्पो होंचि, “बापतिस्मा हियना योहानुना तल्ला उंदि गिन्नेते वाटसि नाकु हीम,” इंचि इत्ता.

26 इद केंजसि राजांक इरगा दुक्कम वाता. गानि अगा मत्ता अंटोर हेडमितोराहाटीं आनि तित्ता ओट्टुहाटीं, दानकु हीतन इत्तद हिय्योन इना पराहिल्लोर.

27 अस्के राजाल, जेलते मत्ता योहानुना तल्ला कोय्सि ता इंचि वरोर सिपाइंक बिराना आदेस हीसि लोहतोर.

28 आ सिपाइ जेलते होंचि, योहानुना तल्ला कोय्सि, उंदि गिन्नेते वाट्सि तच्चि पेगिड्क हीतोर, अस्के आ पेगिड अदुन दाना यावांक हीता.

29 इद पोल्ले योहानुना सिस्युल्कुंक तेळियता. अस्के ओर होंचि ओना पीनगुन ओसि बोंदाते इरतुर.

हेय्युं वेय्कुना मंदिक गाटो दोसमळ

(मत्तयाल 14:13-21; लूकाल 9:10-17; योहान 6:1-14)

30 नार-नार होंचि मत्ता येसुना प्रेरितुल्क, येसुनगा मल्सि वातुर. ओर होंचि लोकुल्कुंक बतल-बतल कीतुर, बतल-बतल कराहतुर इवन्नि पोल्लें येसुंक वेहतुर.

31 ओरगा वायानुर-होनानुर लोकुल्क वेल्लेटुर मत्तुर, ओर्क गाटो तिनालयगुडा वेला दोर्काकोंदु. अदुनहाटीं, “मीक अराम क्रिया पीता, बोरि हिल्ला जेगातगा दाकोम दट,” इंचि येसु ओर्कुन इत्तोर.

32 अस्के ओर उंदि डोंगाते उद्दिदेसि बोरि हिल्ला जेगाते होत्तुर.

33 गानि वेल्लेटुर लोकुल्क ओर्कुन होननेके हळसि एरपाट कीतुर. अदुनहाटीं अन्नि सहरकुनाल विच्चि वासि, ओर्कन्ना मुन्नेने अगा जमा आतुर.

34 येसु डोंगाताल रेयसि अद जेगातगा वेल्लेने मंदितुन हळतस्के, कोहानोर हिल्ला गोरि बल्हा मनांतंगो ओर अल्हा आसि मत्तुर. अदुनहाटीं ओनकु ओरपोरि दया वासि ओर ओर्क पेनदा पोल्लें कराहलय सुस्व कीतोर.

35-36 पोळद होनना वेलाक सिस्युल्क येसुनगा वासि, “मनम सुनसान जेगाते मंतोम, वेलागुडा बागेन आता. लोकुल्कन लोहचीम, ओर दग्गेटा नाहकुने होंचि, ओराहाटी तिनालय बतलन्ना अस्कुंतुर,” इंचि इत्तुर.

37 गानि, “मिमेटे ओर्क हीम्टु,” इंचि ओर्कुन येसु इत्तोर. अस्के ओर इत्तुर गदा, “रोंडु नुहकुना दिनारकुनतोनि* अंतोराहाटी तिडि अस्सि तच्चि हियमळा बतला?” इंचि पूसकीतुर.

38 “मिहगा बच्चुं हारिं मंतां, होंचि हळट,” इंचि येसु इत्तोर. ओर अवुन हळसि, “हेय्युं हारिं, रोंडु जिम्मां मंतां,” इंचि वेहतुर.

39 अस्के येसु, “अंतोर लोकुल्कन पच्चाटा जाडि पोर्री गुप-गुपुने उप्सट,” इंचि सिस्युल्कुंक आदेस हीतोर.

40 ओर अंतोर गुप-गुपकुने उदतुर, उंदि गुपने एबै, नूर इल्हा मत्तुर.

41 अस्के येसु अव हेय्युं हारिं, रोंडु जिम्मां कय्दे पीसि, स्वर्गमताहेके हळसि पेनदुक दन्यवाद कीतोर. अवुन तुकडें कीसि, “ओर्क पंचि हीम्टु” इंचि सिस्युल्कुंक हीसीतोर. अल्हेने अव रोंडु जिम्मानगुडा तुकडां कीसि हीतोर.

42 ओर अंतोर पीरनिंडा तित्तुर.

43 तिनुड आतस्के मिगुल्ता हारिना आनि जिम्माना तुकडां जमा कीते पन्नेड तट्टां निंडतां.

44 हारिं तित्तोरव्टे, सिराप मांडसे हेय्युं वेय्कुना मंदि मत्तुर.

येसु एतपोर्री ताकमळ

(मत्तयाल 14:22-33; योहान 6:16-21)

45 अद आता पजा येसु बिराना ओना सिस्युल्कन डोंगाते उपिच्चि, “मिमेट अंतोर समुद्रमता हब्बेटा बाजुंक मंदना बेतसेदा सहरते नाकन्ना मुन्नेने होंट,” इंचि इत्तोर. अगा मत्ता लोकुल्कन ओरा नाहकुनहेके होनालय सालां कीतोर.

46 ओर्कुन सालां कीता पजा, येसु पारतना कियालय गुट्टापपोर्री होत्तोर.

47 पोळद होत्ता पजा सिस्युल्कुना डोंगा नड्डुम समुद्रमते मत्ता, गानि येसु वरोरे ओड्डुनपोर्री मत्तोर.

48 समुद्रमते वळि-दुमारम डोंगाक एदुर तेदताहाटी सिस्युल्कुंक डोंगा ताकसालय तकलिप होंचेके मत्तद येसु हळतोर. हळसि, नर्कटां मूड-नालुं एगाना

* 6:37 दिनार इद कोत्ता आंद. उंदि दिनार इत्ते उंदि रोजुना बूतित्तचो दाना विलुवा मनंता.

वेलाते येसु सिस्स्युल्कुना डोंगातेके एतपोर्रो ताकसेक होत्तोर. ओर ओरगटाल मुन्ने पेय्सि होननदे मत्ता,

49-50 गानि येसु एतपोर्रो ताकानद हळसि देय्यम इंचि मोत्कुत्तुर, बारित्ते अंटोर ओन हळसि वेरियतुर. अस्के येसु, “वेरियमट! ननाने आंदुन. दैरनेमते मंडु!” इंचि इत्तोर.

51 पजा सिस्स्युल्कुना डोंगाते येसु एक्कुता एक्कुडे वळि-दुमारम बंद आता. अद हळसि ओर्क वेल्ले इंचंन्रम आता.

52 बारित्ते मुन्ने हेय्युं वेय्कुना मंदिक गाटो दोसतद हळसि मत्तुर, अय्नागानि येसु सामिना बलमतुन ओर एरपाट किया हिल्लुर. ओरा मनसुक बंडालेसी आसि होत्तां.

बिमार मत्तोर्कुन येसु बेस कीतोर (मत्तयाल 14:34-36)

53 पजा ओर अद समुद्रम दाटसि गेनेसरेत इनना नाटे एव्वि, अगा डोंगातुन आपतुर.

54 ओर डोंगाताल रेयनेकेन वेल्लेदुर लोकुल्क हळसि येसुन एरपाट कीतुर.

55 पकापीसि मत्ता नाह्कुने विच्चि होंचि बिमार मत्तोर्कुन कटुल्कुने वाटसि येसु बगा मंतोर इंचि तेल्पिचकुंचि, अगा-अगा कांजसेक ओयुंदुर.

56 येसु नाटेने, सहरते, नेलिने बद-बद जेगाते अय्ते होनुंदुरो, अगाटा बिमार मत्तोर्कुन चौकते तच्चि मीडिच्चि, “सिराप नीवा कप्पिडता अंचुन इट्टा हीम,” इंचि येसुन विनंति कियुंदुर. अल्हा बोर-बोर अय्ते ओना अंचुन इट्टुरो, ओर अंटोर पुरागा बेस आतुर.

7

पेद्दाल्कुना रीति-रिवाजता बारेमते कराहमळ (मत्तयाल 15:1-9)

1 उंदि रोजु येस्सलेमताल इच्चुर परिसिल्क आनि दर्मसास्त्रम कराहना गुस्लक येसुनगा जमा आतुर.

2 येसुना इच्चुर सिस्स्युल्कु यहदि लोकुल्कुना रीति-रिवाज परकारम सुद्द आयाकोटेन इत्ते, कय्क नोर्किने तिनानद ओर हळतुर.

3 बारित्ते, परिसिल्क आनि यहुदिल्क अंटोर पेद्दाल्कुना रीति-रिवाज मत्ताप कय नोर्रका तिन्नुर.

4 इंका ओर हाटुम होंचि वायना गानि एर तुंगाका तिन्नुर. अचोने आयका वाटिं, तालि, रागिता बोळिं नोर्रमळ इसोंटव पेद्दाल्कुनाल ताकसेक वाता रीति-रिवाजकुन नोमंतुर.

5 अय्ते, “नीवा सिस्स्युल्क, पेद्दाल्कुना रीति-रिवाजुने बारि ताकुर, तिनाका मुन्ने ओर कय्क बारि नोर्रर?” इंचि परिसिल्क आनि दर्मसास्त्रम कराहना गुस्ल्लक येसुन पूसकीतुर.

6 अस्के येसु ओर्कुन इल्हा इत्तोर, “यसायाह इनना पेनदा कबुरतोर, मीवसोंटा डोंगिरा बारेमते निजमे बविस्स्यवानि कीतोर: ‘ईर लोकुल्क सिराप तोळ्देने नावा कदर कींतुर, गानि ईरा मनसु मात्रम नहागटाल बच्चोनों लक्कु मनांता.

7 ईर अंगडमे नावा आरादना कीसेके मनांतुर. बारित्ते, ओराहाटीं मनकालोर तयार कीता रीति-रिवाजके निजमतव, अवनुना पालन कियमळे दर्मम इंचि कराहंतुर, ☆ इल्हा रासि मंता.

8 मिमेट पेन हीता आदेसतुन होळसि, मनकल तयार कीतव रीति-रिवाजकुन पीसि ताकसेक मंतरि,” इंचि इत्तोर.

9 मर्रा ओरतोनि, “मीवा रीति-रिवाजकुन पीसि ताकानाहाटीं, पेनदा आदेसतुन लक्कु कियमळ मीक बेस अनपिच्चंता,” इंचि इत्तोर.

10 “निमे नीवा तल्लुर-बाबोना कदर कीम, बोर अय्ते तल्लुर-बाबोन रांगंतोर, ओन हक्कमळे गावाले,” इंचि मूसाल इत्तोर.

11-12 गानि, “मिमेट अय्ते, बोरन्ना मनकल ओना तल्लुर-बाबोन, नना मीकु हियानद पेनदुक कोर्बान* इंचि हीतन इनानय्ते, मिमेट ओन ओना तल्लुर-बाबोना सेवा किया हिथ्यिर, इंचि कराहंतिर.

13 इल्हा मिमेट तयार कीता, मीवा रीति-रिवाजकुनाहाटीं पेनदा पोल्लेतुन होळसेक मंतरि. इल्हा इंका बच्चुंगो कबाहक कीतिर,” इंचि वेहतोर.

मनकन हेळहना पोल्लें

14 मर्र्दि मल्का येसु लोकुल्कुन दग्गेर्क केय्सि, “मिमेट अंटोर नना वेहानद केंजट आनि अर्तम कीकुंटु,” इंचि वेहालय सुस्व कीतोर.

☆ 7:7 यसायाह 29:13 * 7:11-12 कोर्बान पेनदुक मोक्कु हीता वस्तुकुन कोर्बान इंचि इनुदुर.

15-16 “पलाताल मनकना पीटे होनानव ओन हेळ्हों, गानि मनकना तोळ्दाल पलाते पेय्सना पोल्लेंगे ओन हेळ्हंतां,” इंचि वेहतोर. बोर्कु केंजालय केव्क मंतां ओर केंजट.†

17 पजा येसु लोकल्कुन होळसिसि, सतता लोन होत्तोर. अस्के ओना सिस्युल्कु ओर वेहता वेसुडिता अर्तम पूसकीतुर.

18 अस्के येसु ओर्कुन इल्हा इत्तोर. “पलाताल बतल अय्ते पीटे दांता, अद मनकन हेळ्हो इंचि मीकु इंकागुडा तेळियोना?”

19 पलाताल होनानद ओना मनसुने होन्नो गानि ओना पीटे दांता. पजा पलाते अर्ता,” अल्हा वेह्चि, तिनानव अन्नि तिडिं तिनालय बेसतवे इत्तोर.

20 पजा ओर इल्हा वेहतोर, “मनकना लोप्पोटाल बतल अय्ते पलाते पेय्संता अदे मनकन हेळ्हंता.

21 बारित्ते मनकना मनसुनाल कराब विचाराल्क, बोगमतनम, दोंगातनाल्क, हक्कमळ, व्यबिचारम,

22 आस्ति कियमळ, दुस्ट गुनम, डोंगिगुनम, मेंदुलता आसे, कळ्क पोतमळ, अपमानम कियमळ, गर्रां आनि मुर्का गुनाल्क पलाते पेय्संतां.

23 इव अन्नि सेड्डा पोल्लें मनकना तोळ्दाल पलाते पेय्सि, मनकन हेळ्हंतां,” इंचि वेहतोर.

यहुदि आयवा मुरतटा विस्वासम (मत्तयाल 15:21-28)

24 पजा येसु अगटाल तेदसि सूर, सिदोन एरियाते होत्तोर. अगा मनानद बोनके तेळिया मनि इनकुंचि, ओर उंदि लोन होंचि आगतोर. गानि मक्का पर्रां हिल्लोर.

25-26 उंदि युनानि मुरतळ येसुना बारेमते केंजता. अद सिरिया देसेमता पोनिशिया इनना नाटे पुटतद आंदु. दाना सिन्ना मियाटुन देय्यम पीसि मत्ताहाटीं अद येसुनगा वासि, ओना काल्कुनपोर्रो अरता. अर्सि “देय्यमतुन पेच्हाचि गेदमा,” इंचि येसुन विनंति कीता.

27 येसु अदुन, “पिलाल्क मोदाला पीरनिंडा तिनिरकांटी, पिलाल्कुना हारि तेंडकुंचि नय्कुंक वाटमळ बेस आयो,” इंचि इत्तोर.

28 गानि आ मुरतळ, “निजमे सामि! पिलाल्क तिननेंके हिळु अरता अंटकुल्कुन अय्ते नय्के तितां गदा!” इंचि येसुक जवाब हीता.

† 7:15-16 इद वचनम कोन्नि पांडु लिपिने हिल्ले.

29 अस्के, “निमे इल्हा इत्ताहाटी, नीवा मिथ्यटाल देय्यम पेय्सि होत्ता. निमे लोन होन,” इंचि येसु इत्तोर.

30 अद मुरतळ लोन होंचि हळतस्के, दाना मिथ्यड कटुलते मींडसि मंता, दानाल देय्यमगुडा पेय्सि होत्ता इंचि अद हळता.

पनकना-सेव्ठि मनकन येसु बेस कियमळ

31 अद आता पजा येसु सू एरियाताल मल्सि सिदोन होत्तोर. अगटाल देकापोलिस एरिया दाटसि गालिल समुद्रमतगा वातोर.

32 अस्के इच्चुर लोकुलक, वरोर पनकना-सेव्ठि मनकन येसुनगा पीसि वासि, “नीवा कय ईना पोरो ईर्रा,” इंचि विनंति कीतुर.

33 येसु आ पनकना-सेव्ठि मनकन मंदिताल पक्कक ओसि, ओना केव्कुने सतता वेल्कु दोसतोर, आयंका आ वेल्कुना पोरो उस्किसि ओना नाल्केतुन इत्तोर.

34 मब्बुनहेके हळसेक जोरसे नेस्किसि “एप्पता” इत्तोर. इत्ते कुल्ला आम इंचि अर्तम.

35 अस्केने ओना केव्क केंजा वायालय दल्गतां, ओना नाल्केगुडा मेसलिसि ओर साप वळ्कालय दल्गतोर.

36 इद पोल्ले बोर्के वेहमट इंचि येसु ओर्कु गट्टिगा वेहतोर गानि लोकुलकुंक ओर वेहतादानकन्ना एक्को वेहासेक होत्तुर.

37 केंजता लोकुलक अंतोर इचंत्रम आसि, “ओर बतलय्ते कीतोर, बेस कीतोर. सेव्ठोर्कुन केंजा वायानाल, मूकालोर्कुन वळ्का वायानाल कीतोर,” इंचि इत्तुर.

8

नालुं वेय्कुना मंदिक येसु गाटो दोसंतोर
(मत्तयाल 15:32-39)

1 अव रोजकुने मरंदि मल्का येसुनगा वेल्लेन लोकुलक जमा आतुर. ओरगा तिनालय बतले मनाहिल्ले. अदुनहाटी येसु ओना सिस्युल्कुन दग्गेर्क केय्सि,

2 “ईर लोकुलक नहगा मूड रोजकुनाल मंतुर, ईरगा तिनालय बतल हिल्ले. अदुनहाटी नाक ई लोकुलकुन हळसि पापम अनपिच्चंता.

3 इच्चुर लोकुलक वेल्ले लक्कुटाल वातोर मंतुर. ननागिंटा ईर्कुन कर्वुने लोन लोहानय्ते, नड्डुम हर्दे बगानना कूलाबडनुर,” इंचि इत्तोर.

4 अस्के, “ई उसके बूमि ते इच्चो वेल्ले लोकुकुंक हालानाल तिंडि बगाटाल तरा परकोम?” इंचि सिस्युल्क येसुंक जवाब हीतुर.

5 अस्के, “मिहगा बच्चुं हारि मंतां?” इंचि येसु ओर्कुन पूसकीतस्के, ओर, “एडुं हारि मंतां” इंचि इत्तुर.

6 पजा येसु मंदितुन हिळ्ळू बूमिपोर्री उदूदा वेहतोर. आ एडुं हारि पीसि पेनदुक दन्यवाद कीतोर. हारिन तुकडां कीसि, “ओर्क तूसि हीम्टु” इंचि सिस्युल्कुंक हीतोर. अस्के सिस्युल्कु मंदिकु तूसि हीतुर.

7 ओरगा इच्चुं सिन्ना जिम्मांगुडा मत्तां. येसु अबुनहाटीगुडा पेनदुक दन्यवाद कीसि “लोकुकुंक तूसि हीम्टु” इंचि सिस्युल्कुंक आदेस हीतोर.

8 अगा मत्तोर अंतोरगुडा पीरनिंडा तित्तुर. पजा मिगुल्ता हारि तुकडन जमा कीते, अब एडुं तट्टां निंडतां.

9-10 अगा तित्तोरव्ते दग्गेरा-दग्गेरा नालुं वेय्कुना लोकुल्क मत्तुर. ओर अंतोर्कुन साल्ना कीसि, येसु बिराना ओना सिस्युल्कुनतोनोनि उंदि डोंगाते उद्दिदिसि दलमनुता एरियाक होत्तोर.

परिसिल्क येसुना पट्टु हळंतुर

(मत्तयाल 16:1-4; लूकाल 11:16,29)

11 पजा येसुना पट्टु हळना इंचि, “निमे पेनदा अदिकारम पीसि वातिन इंचि नम्मालय, स्वर्गमताल माकु उंदि चिन्ह हुप्सा,” इंचि परिसिल्क ओन पूसकियालय दल्गतुर.

12 अस्के येसु आत्माते जोरते नेस्किसि, “इद पीळितोर चिन्ह हुप्सा इंचि बारि इंतुर? नना मीक निजम वेहंतन, इद पीळितोर्क बदे चिन्ह हुपिचमळ जर्गो,” इंचि इत्तोर.

13 पजा ओर्कुन अग्गेन होळसि, डोंगाते उद्दिदिसि समुद्रमता हब्बेता ओड्डुंक होत्तोर.

यहुदिल्कुनाल जेगर्ता मंटु

(मत्तयाल 16:5-12)

14 सिस्युल्कु हारि ओयालय मरंगतुर. आनि ओरगा डोंगाते उंदे हारि मत्ता.

15 अस्के येसु ओर्कुन इल्हा जेगर्ता कीतोर. “परिसिल्क आनि हेरोदना पुल्लटा पिंडिता बारेमते जेगर्ता मंटु,” इत्तोर.

16 अद केंजसि, “मनागा अयते हारि हिल्लें,” इल्हा इंचेके सिस्स्युल्कु ओर-ओरे वळ्ळकुकुतुर.

17 येसु अदुन एरपाट कीसि, “हारि हिल्लें इल्हा विचारम मिमेट बारि कीसेक मंतिट? इदवेरदाकागुडा मीकु तेळिया हिल्लेना? एरपाट कीसेक हिल्लिरा? मीवा मनसु बंडा आताना?

18 मीक कळ्ळकु मंचिगुडा ह्ळा परसेक हिल्लिरा? केव्क मंचिगुडा केंजा परसेक हिल्लिरा? मिमेट मति मर्गतिरा?

19 नना हेय्युं वेय्कुना मंदिहाटीं हेय्युं हारि उराहचि दोसतन, अस्के बच्चुं तट्टाना हारि मिमेट जमा कीसि निहतिर?” इंचि पूसकीतोर. अस्के, “पन्नेंड तट्टां” इंचि ओर जवाब हीतुर.

20 आनि “अल्हेने, एडुं हारिनतोनि नालुं वेय्कुना मंदि तित्तस्के, बच्चुं तट्टाना हारि तुकडां जमा कीतिर?” इंचि येसु पूसकीतोर. अस्के, “एडुं तट्टां” इंचि ओर वेहतुर.

21 “अयते मीकु इंकागुडा तेळियसेक हिल्लेना?” इंचि येसु इत्तोर.

येसु बेतसेदा नाटेना गुड्डिड मनकन बेस कीतोर

22 ओर बेतसेदा इनना नाटे एव्ता पजा इच्चुर लोकुल्क वरोर गुड्डिडन येसुनगा पीसि वासि, “निमे ईन इट्टा,” इंचि विनंति कीतुर.

23 येसु आ गुड्डिडना कय पीसि नाटेना पलाते ओतोर. ओसि गुड्डिडना कळ्ळकुने उस्कतोर. पजा ओनपोर्रीं कय इर्सि, “इंदके नीकु बतलन्ना दिस्सेक मंतना?” इंचि पूसकीतोर.

24 अस्के आ गुड्डिड मनकल पोर्रीं हळसि, “मनकालोर दिस्सेक मंतुर गानि ओर मराकु ताकताप मागुर-मागुर दिस्सेक मंतुर,” इंचि इत्तोर.

25 अस्के येसु मर्रां उंदि मल्का ओना कय्क, आ गुड्डिडना कळ्ळकुना पोर्रीं इरतोर. ओर उंदेतीर हळता पजा नदर वाता. ओन्क अन्नि साप-साप दिसालय दल्गतां.

26 अस्के, “निमे नाटे होळियाकोटा, सवरगा नीवा लोन होन,” इंचि येसु ओन लोहचीतोर.

येसुन “किरिस्तु” इंचि पत्रु ओप्कुंतोर

(मत्तयाल 16:13-20; लूकाल 9:18-21)

27 येसु, ओना सिस्स्युल्क कैसरिया पिलिपि सहरता पकापीसि मत्ता नाहकुने होत्तुर. होननेके, “नना बोन आंदुन इंचि लोकुल्क इंतुर?” इंचि येसु सिस्स्युल्कुन पूसकीतोर.

28 अस्के सिस्स्युल्क इल्हा वेहतुर. “इच्चुर इंतुर निमे बापतिस्मा हियना योहानुन आंदिन, इंका इच्चुर इंतुर निमे एलियाल आंदिन, इंका बोरो इंतुर निमे पेनदा कबुरतोर लोप्पोटाल बोनो वरोन आंदिन,” इत्तुर.

29 “अय्ते, नना बोन आंदुन इंचि मिमेट इंचेके मंतिट?” इंचि येसु ओर्कुन पूसकीतस्के, “निमे किरिस्तुन आंदिन,” इंचि पत्रु इत्तोर.

30 अस्के, “नावा बारेमते बोर्के वेहमट,” इंचि येसु ओर्क गट्टिगा वेहतोर.

येसु ओना हामुरता बारेमते वेहंतोर

(मत्तयाल 16:21-28; लूकाल 9:22-27)

31 पजा ओना सिस्स्युल्कुं इल्हा कराहलय दल्गतोर. “यहुदि पेद्दाल्क, पेद्दा पेर्मांलोर आनि दर्मसास्त्रम कराहना गुस्कुनाहेंदाल मनकना रूपमते पुटतोन नाकु तिप्पल्क अर्मापीता. ओर हय्साकोटा आसि नाकुन हक्कानुर. गानि नना हासि मूड रोजकुं मर्रा जीवाते तेदंतन,” इत्तोर.

32-33 येसु इद पोल्लेतुन कुल्ला-कुल्ला वेहतोर. अय्ते पत्रु येसुन अलग ओसि रांगतोर. गानि येसु सिस्स्युल्कुनहेके तिरियसि ह्ळसि पत्रुन, “अरे देय्यम, नावा मुन्नेटाल पेय्सि होन. निमे मनकालोरा तेल्विते वळ्कसतिन, पेनदा विचारमते वळ्कसेक हिल्लिन,” इंचि ओन रांगतोर.

34 पजा येसु ओना सिस्स्युल्कुन आनि लोकुल्कुन ओनहेके केय्सि इल्हा वेहालय दल्गतोर, “ओक्कला बोरन्ना मनकल नावा पज्जो वायना इत्ते, ओर ओना पूरा इस्टाल्क होळसिसि सतता कूस तेहकुंचि नावा पज्जो वायिर.

35 बारित्ते, बोर अय्ते ओना जीवातुन पिसागोटालय ह्ळंतोर, ओर ओना जीवातुन पोगोटकुंतोर. गानि बोर अय्ते नाहाटीं आनि बेसता कबुरताहाटीं जीवा हीतोर, ओर ओना जीवातुन कापाळकुंतोर.

36 ओक्कला मनकल पूरा दुनियातुन संपलिच्चि, ओना जीवातुन पोगोटकुत्ते ओन्क बता पायदा आंता?

37 हिलाकोटे मनकल ओना जीवाहाटीं बदला बतल हियानुर?

38 बोगमतनमते, पापमते निडिस मत्ता इद पीळितोर नड्डुम बोर अय्ते नाकुन, नावा पोल्लेन वेहालय सिग्गु अर्तोर, मनकना रूपमते पुटतोन नना बस्के अय्ते पवित्र

दूतनतोन, नावा बाबाना महिमाते वाकन, अस्के असोटा मनकन नावोर इनालय ननागुडा सिग्गु अरतन,” इंचि वेहतोर.

9

1 मर्रा येसु ओर्कुन इल्हा इत्तोर. “नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, पेनदा राज्येमतुन दाना ताकततोन वातद ह्ळवा, ओर्कु हामुर वायो,” इत्तोर.

येसुना रूपम मारियमळ

(मत्तयाल 17:1-13; लुकाल 9:28-36)

2 हासं रोजकु आतारित्ते येसु पत्रुन, याकोबुन आनि योहानुन पीकुंचि उंदि एत्तु गुट्टापोर्रो होत्तोर. अगा ओरा मुन्ने ओना रूपम मारियता.

3 ओना कपडिं इच्चोर तेल्लगा मेर्सेक मत्तां गदा, बूमि पोर्रोटीर बोरे साकलल अच्चोर तेल्लगा आयनाल हुक्का परोर.

4 अस्के मूसाल आनि एलियाल* येसुनतोन वळकानद ओर ह्ळतुर.

5-6 ह्ळसि ओर इरगा वेरियतुर. अदुनहाटीं पत्रु येसुनतोन बतल वळकना अद तेळियका, “गुरु! मनम इग्गे मनमळ बेस मंता. उंदि नीहाटीं, उंदि एलियानाहाटीं, उंदि मूसानाहाटीं मोमोट मूड गूळसें वाटंतोम,” इंचि इत्तोर.

7 अस्केने उंदि मब्बु तेर्पे वासि ओर्कुन मुच्ता. आ मब्बुनाल, “इं नावा पावरमगल्ला मर्री आंदुर, ईना पोल्लें केंजट,” इंचि ओर्क अल्किर केंजावाता.

8 अस्के अचानक ओर नालुं-मूलां ह्ळतुर गानि येसुक तप्पा अगा बोरे दिसा हिल्लुर.

9 ओर गुट्टा पोर्रोटाल हिळ्ळ रेय्नेके, “मनकना रूपमते पुटतोन नना हामुरताल मर्रा तेदनदाका, गुट्टापोर्रो मिमेट बतल अय्ते ह्ळतिरो अद बोर्के वेहमट,” इंचि येसु ओर्क गट्टिगा वेहतोर.

10 ओर अद पोल्लेतुन ओरा मनसुनेन इरतुर गानि “हातोरा लोप्पोटाल मर्रा जीवाते तेदमळ, इत्ते बतल?” इंचि ओर वरोंक-वरोर वळककुनालय दल्गतुर.

11 पजा ओर येसुन, “किरिस्तुंकन्ना मुन्ने, एलियाले वायमळ गावाले इंचि दर्मसास्त्रम कराहना गुस्लक बारि इंतुर?” इंचि पूसकीतुर.

* 9:4 मूसाल आनि एलियाल मूसाल आनि एलियाल पेनदा कब्बुरतोर आंदुर.

12 अस्के येसु ओर्क इल्हा वेहतोर. “एलियाल तप्पाकोटा मोदाला वांतोर. वासि मोदाला बल्हा मत्ता अल्हे अन्निन कीतोर. गानि मनकना रूपमते पुटतोन नाकु वेल्ले तकलिप बोगांचा पीता, नाकुन हय्सुर इंचि दर्मसास्त्रमते बारि रासि मंता?

13 गानि नना मीकु वेहानद बतल इत्ते, एलियाल वासे मंतोर. ओना बारेमते दर्मसास्त्रमते बल्हा रासि मंता, अल्हेने लोकुल्क ओरा मनसुक वाताप ओनतोनि कीतुर,” इंचि येसु ओर्क वेहतोर.

देय्यम पीता पेडन येसु बेस कीतोर

(मत्तयाल 17:14-20; लकाल 9:37-43)

14 पजा येसु आनि सिस्थुल्क, हिळु मत्ता सिस्थुल्कुनगा वासि हळतस्के, ओरा सुट्टु वेल्लेन लोकुल्क जमा आसि मत्तुर. आनि दर्मसास्त्रम कराहना गुस्लक ओरतोनि लोल्लि कीसेके मत्तुर.

15 अगा मत्ता लोकुल्क येसुन हळसि इचंत्रमते अरतुर, पजा अंटोरगुडा बिराना विच्चि होंचि ओन्क जोहार कीतुर.

16 अस्के येसु, “मिमेत ईरतोनि बारि वदुरकुंचेक मंतिट?” इंचि दर्मसास्त्रम कराहना गुस्लकुन पूसकीतोर.

17 अस्के आ मंदिताल बोरो वरोर येसुन, “गुरु, ना मर्रिक मूका-देय्यम पीता, ओन निहगा पीसि तत्तन.

18 देय्यम ओन बस्के अयते पीता, अस्के ओन अग्गेन हिळु हुक्कंता. ओना तोळदाल पोंगुर पेयसंता. ओर कर्रा-कर्रा पल्कु कोर्कसेके अल्हेने गाट्टिगा आंतोर. इद देय्यमतुन ओना लोप्पोटाल गेदमट इंचि नीवा सिस्थुल्कुंक वेहतन गानि ओरतोनि आया पर्रीहिल्ले,” इंचि वेहतोर.

19 अस्के येसु ओर्कुन, “अरे विस्वासम तक्को पीळितोरिटा! नना बदवेरदाका मीतोनि मनकन? बदवेरदाका नना मीकुन सहन कीकन? ओन नाहेके पीसि वट,” इंचि इत्तोर.

20 ओर आ पेडन येसुनगा पीसि वातुर. देय्यम येसुन हळता-हळुळे, पेडन तेल्लाचि हिळु अरहता. आ पेडल तोळदाल पोंगुर पेचाहसेके पोर्लीलय दलगतोर.

21-22 अस्के, “नी मर्रिक इल्हा बस्केटाल आसेक मंता?” इंचि येसु पेडाना बाबोन पूसकीतोर. अयते ओर, “सिन्नस्केटाले इल्हा आसेक मंता. बच्चुंगो मल्कां तळमिंते अरहचि, एते अरहचि हळ्कालय हळता गानि निमे मापोर्री दया वासि, माहाटी बतलन्ना सहायम कियापर्ते कीम,” इंचि इत्तोर.

23 येसु ओन, “कियापर्ते कीम, इत्ते बतल इत्ताप? पेनदापोर्रो विस्वासम कियानोर्क अन्नि आया परांतां,” इंचि इत्तोर.

24 अस्केने पेडाना बाबल कांडेर तेंडसेके, “नना विस्वासम कीतन सामि, नावा विस्वासम गट्टिगा आयालय सहायम कीम” इंचि इत्तोर.

25 वेल्लेट्टुर लोकुल्क विच्चि वासि गर्दि कियानद हळसि येसु आ देय्यमतुन, “सेव्दि-मूका देय्यमतुना, नना नीकु हुकुम हीतन, ईनगटाल पलाते पेयसा, ईन मर्रा बस्केने पियमा,” इंचि गदरिचतोर.

26 अस्के आ देय्यम ओन जोरसे तेलहाचि, वरगेय्सि आ पेडाना लोप्पोटाल पेय्सि होत्ता. अस्के पेडल हातोनलेसीं आतोर. वेल्लेट्टुर लोकुल्क ओन हातोर इत्तुर.

27 गानि येसु ओना कय पीसि तेहातस्के ओर तेदसि निल्लोर.

28 पजा येसु लोन होतस्के बोरि हिल्वद हळसि सिस्सुल्क येसुनगा वासि, “आ देय्यमतुन मोमोट बारि गेदमा पर्रा हिल्लोम,” इंचि पूसकीतुर.

29 येसु ओर्कुन, “इसोटा देय्यमतुन सिराप पारतनातोने गेदमा पर्रांतोम,” इंचि इत्तोर.

येसु ओना हामुरता बारेमते वेहंतोर

(मत्तयाल 17:22-23; लूकाल 9:43-45)

30-31 पजा ओर अगटाल पेय्सि गालिल राज्यमताल होंचेक मत्तुर. ओर होनानद बोर्कन्ना तेळियमळ येसुंक इस्टम मनाहिल्ले. बारित्ते येसु ओना सिस्सुल्कुंक, “मनकना रूपमते पुटतोन नाकुन, वरोर दोकाते पीसि, लोकुल्कुना कय्दे हींतोर. ओर नाकुन हव्कानुर गानि, मूड रोजकु आतंका नना मर्रा जीवाते तेदंतन,” इंचि कराहचेके मत्तोर.

32 गानि येसु वेहता पोल्ले ओर्क तेळिया हिल्ले. आनि ओन पूस कियालयगुडा ओर वेरियतुर.

अंतोर्कन्ना पेद्दा बोर इंचि येसु वेहमळ

(मत्तयाल 18:1-5; लूकाल 9:46-48)

33 ओर कपर्नाहमते एवसि उंदि लोते मत्तस्के, “हर्रि पीसि वायानेके मिमेट बतल वळ्कसेक वातित?” इंचि येसु सिस्सुल्कुन पूसकीतोर.

34 गानि “अंतोर्कन्ना पेद्दा बोर?” इंचि ओर वरोक वरोर वळ्कसेक वातुर. अदुनहाटीं ओर चुपचाप मत्तुर.

35 अस्के येसु उद्दिदसि ओना पन्नेंड सिस्युल्कुन केय्सि ओर्कुन इल्हा इत्तोर. “बोर अय्ते पेद्दा आंतन इनकुंतोरो, ओर अंतोर्कन्ना सिन्नोड आसि अंतोरा सेवा कियानोर आयापींता,” इंचि ओर्क वेहतोर.

36 वेह्चि, वरोर सिन्ना पेडन ओरा नड्डुम निलाहतोर. पजा ओन दग्गेरा पीकुंचि ओर्कुन इल्हा इत्तोर.

37 “बोर अय्ते ई सिन्ना पेडनलेसीं आसि मनानोन नावा पोरोलते ओप्कुंतुरो, ओर नाकुनगुडा ओप्कुंतुर. बोर अय्ते नाकुन ओप्कुंतुर ओर सिराप नाकुने आयो गानि नाकुन लोहतोनगुडा ओप्कुंतुर,” इंचि वेहतोर.

मनाकु विरोदमते हिल्लोर मनोरे आंदुर (लूकाल 9:49-50)

38 अस्के योहान येसुन, “गुरु! वरोर मनकल नीवा पोरोलते देय्याल्कुन पेचाहनेके मोमोट हळतोम, मालेसीं ओर नी पज्जो ताकानोर आयोर. अदुनहाटीं अल्हा कियमा इंचि मोमोट ओन आपतोम,” इत्तोर.

39 अस्के येसु ओन इल्हा इत्तोर. “बोर अय्ते ना पोरोलते अद्बूतामाता कबाहक कींतोरो, ओर नावा विरोदमते बिराना कराब वळ्का परीर, अदुनहाटीं ओन आपमट.

40 बारित्ते बोर अय्ते मनाकु विरोदमते हिल्लोर, ओर मना बाजुनोरे.

41 नना मीक निजम वेहांतन, मिमेट किरिस्तुना सिस्युल्क इंचि मीक बोरन्ना गिलासमेड एर उनालय हियानय्ते, ओन्क तप्पाकोटा इनाम दोर्कता.

42 नापोरीं विस्वासम कियना ई सिन्ना पेडानसंतोन बोरन्ना पापमते अरहते, ओना बौळ्गेक जोत्ता बंडा दोहचि समुद्रमते दोब्बुतेने बेस मनंता.

43-44 ओक्कला नीवा कय नीकुन पापम किया वेहते, दान नर्किसि पोहा. बारित्ते रोंडु कय्क मंचि बस्केने पिरिकोटा बगाबगा पोल्तना तडमि मनना नरकमते होननदानकन्ना, तोंटि कय आसि पिस्वरते होनमळे नीहाटीं बेस.†

45-46 अल्हेने, ओक्कला नीवा काल नीकुन पापम किया वेहते, दान नर्किसि पोहा. बारित्ते रोंडु काल्क मंचि नरकमते होननदानकन्ना, कूटाल आसि पिस्वरते होनमळे नीहाटीं बेस मनंता.‡

† 9:43-44 इद वचनम कोन्नि पांडु लिपिने हिल्ले. ‡ 9:45-46 इद वचनम कोन्नि पांडु लिपिने हिल्ले.

47-48 अल्हेने, ओक्कला नीवा कळु नीकुन पापम किया वेहते, दान तेंडसि पोहा. बारित्ते रोंडु कळुकु मंचि नरकमते होननदानकन्ना, उंदि कळुदे पेनदा राज्यमते होनमळे नीहाटीं बेस मनंता.

49 बारित्ते हरेक मनकन तळमितोनि होव्वोरलेसीं कियमळ जर्गता.

50 होव्वोर बेसे मनंता गानि होव्वोर, होव्वोरलेसीं रुसि वायाकोटे अव्ते मर्रा बल्हा होव्वोर रुसि तरा परांतोम? अल्हेने मिमेटगुडा होव्वोर रुसिते बेस वरोंक-वरोर कलियसि-मेलियसि सांतिते मंदना,” इंचि येसु वेहतोर.

10

सोडसिट्टिता बारेमते परिसिल्क पूसकीतुर

1 पजा येसु अगटाल पेय्सि योर्दन बैरेड दाट्सि यहुदिया एरियाते होत्तोर. अगागुडा लोकुलक मंदानां मंदां ओनगा जमा आयालय दलगतुर. अस्के येसु ओना अलवट परकारम ओर्क कराहलय दलगतोर.

2 अगा इच्चुर परिसिल्कगुडा वातुर. वासि येसुना पट्टु हळानाहाटीं ओन इल्हा पूसकीतुर. “नियम परकारम, वरोर मनकल ओना मुत्तोन होळसिय्या वच्चा?” इत्तुर.

3 अस्के येसु ओर्कुन, “मूसाल मीक बद आदेस हीतोर?” इंचि पूसकीतोर.

4 अय्ते, “वरोर मनकल सोडसिट्टि हीसि, मुत्तोन होळसियना इंचि मूसाना आदेस मंता,” इंचि ओर येसुन इत्तुर.

5 अस्के येसु ओर्कुन इल्हा इत्तोर. “मीवा मनसु बंडालेसीं मत्ताहाटीं मूसाल ई आदेसतुन मीकु रासतोर.

6 गानि बस्के अय्ते पेन ई दुनियातुन कीतानो, अस्केन ओर्कुन मांडसा मुरतळ इल्हा इंचि कीता.

7 अदुनहाटींगे मांडसा ओना यावन-बाबन होळसिसि, ओना मुत्तोनतोनि कलियसि मनंतोर.

8 ओर इव्वुर उंदे मेंदुल आसि मनांतुर. ओर वेरे-वेरे आयुर गानि उंदे मेंदुल आंतुर.

9 इल्हा पेने ओर्कुन कल्पताहाटीं मनकल वेरे कियानायो,” इंचि वेहतोर.

10 पजा, येसु लोन मत्तस्के इदुना बारेमते सिस्युलकु मर्रा उंदि मल्का ओन पूसकीतुर.

11 अस्के येसु ओर्कु इल्हा वेहतोर, “बोरन्ना ओना मुत्तोन बोगमतनम कारनम तप्पा वेरे कारनमते होळसिसि इंकुंदानतोनि मरमिं आयानय्ते, ओर मोदाटा मुत्तोनो विरोदमते बोगमतनम कीताप आंतोर.

12 अल्हेने ओक्कला मुत्तो दाना मुय्दोन होळसिसि इंकावरोनतोनि मरमिं आयानय्ते, अद बोगमतनम कीतद आंता.”

येसु सिन्ना पिलाल्कुंक आसिर्वाद हींतोर

13 उंदि रोज लोकुल्क ओरा पिलाल्कुनपोर्रो येसु कय इर्सि आसिर्वाद हियना इंचि ओनगा पीसि वातुर, गानि सिस्युल्क ओर्कुन रांगतुर.

14 गानि येसु ओर रांगानद हूळसि ओर्कुन इल्हा इत्तोर. “पिलाल्कुन नाहेके वायाहीम्ट, ओर्कुन आपमट. पेनदा राज्येम इंसंटोरदे आंद,

15 नना मीक निजम वेहंतन, बोरे आथिर पेनदा राज्येमतुन सिन्ना पिलाल्कुनालेसीं आसि स्विकार किय्युर, ओर पेनदा राज्येमते बस्केने होळिया पर्र,” इंचि वेहतोर.

16 पजा आ पिलाल्कुन एत्कुंचि, ओरा तल्लापोर्रो कय इर्सि आसिर्वाद हींतोर.

सिरमंत मनकल पेनदा राज्येमते होनमळ वेल्ले कस्टम

17 येसु अगटाल पेय्सि हरिं पीसि होननेके, वरोर मनकल विच्चि वासि काल्कुनपोर्रो अर्सि, “गुरु, निमे बेसतोन आंदिन. बस्केळ्क पिस्सना पिस्वरता वारसदार आयानाहाटीं नना बतल कीते बेस?” इंचि पूसकीतोर.

18 अस्के येसु ओन इल्हा इत्तोर, “नाकुन बारि बेसतोर इतिन? बोरे बेसतोर आयोर, सिराप पेन उंदे बेसतद आंद.

19 नीकु पेनदा आदेसकु अय्ते एरपाटे मंतां: बोने हक्कुमा, बोगमतनम कियमा, दोंगातनम कियमा, आबद्दम गवाइ हियमा, इंकावरोन पसांचमा, नीवा तल्लुर-बाबोना कदर कीम,” इत्तोर.

20 अस्के, “गुरु, नना अय्ते इवन्नि सिन्नास्केटाल कीसेकेन वातन,” इंचि ओर येसुन इत्तोर.

21 येसु ओनहेके हूळतोर. पावरम अनपिच्चि, ओन इल्हा इत्तोर. “निहगा उंदि पोल्ले तक्को मंता. होन, निहगा बतल अय्ते मंता अदुन पूरा अम्मिसि, गरिबोर्कुंक तूसि हीम. अस्के नीकु स्वर्गमते दनम दोर्कार, पजा नहगा वासि ना पज्जो ताका,” इत्तोर.

22 ओनगा सोम्मु वेल्लेन मत्ताहाटीं, येसुना पोल्ले केंजसि ओना मोकम सिम्मरा आता. पजा दुक्कमते अगटाल पेय्सि होत्तोर.

23 अस्के येसु नालुं-मूलां ह्ळसि सिस्स्युल्कुन इल्हा इत्तोर. “सिरमंतुल्क पेनदा राज्येमते होळियमळ इत्ते वेल्लेन कस्टम!” इत्तोर.

24-25 ओना पोल्ले केंजसि सिस्स्युल्क इचंत्रम आतुर. गानि येसु मरुंदि मल्का सिस्स्युल्कुन इल्हा इत्तोर, “पिलाल्कुनिटा! वरोर सिरमंत मनकल पेनदा राज्येमते होळियमळकन्ना लोटापेटा सूदि बोंगाताल होनमळ अल्कगा मनंता,” इत्तोर.

26 इद केंजसि सिस्स्युल्कुंक वेल्लेन इचंत्रम आता. अस्के ओर-ओरे, “अल्हा अय्ते मुक्ति बोर्क दोर्का परंता?” इंचि वळकालय दल्गातुर.

27 अस्के येसु ओराहेके ह्ळसि, “मनकालोरतोनि अय्ते इद आयापर्री गानि पेनतोनि आंता. बारित्ते पेन अन्नि कियेा परंता,” इंचि इत्तोर.

28 अस्के पत्रु, “ह्ळ्हा, मोमोट अय्ते मत्तद-हिलवद अन्नि होळसिसि नीवा पज्जो वातोम,” इंचि येसुन इत्तोर.

29-30 येसु ओन, “नना निजम वेहांतन. बोरे आयिर नावाहाटीं, बेसता कबुरताहाटीं ओना लोन दारातुन, तम्मुहक-दादालोर्कुन, अक्कल-हेलाहकुन, तल्लुर-बाबोन, पिलाल्कुन, बूमि-जेगातुन होळसीतोर. ओन्क इंदकेने नूर अंताल्क एक्को लोन दारा, तम्मुहक-दादालोर्क, अक्कल-हेलाहक, तल्लुहक, पिलाल्क, बूमि-जेगा दोर्कार. ओन्क कस्टाल्क वायानुं गानि वायाना कालमते ओन्क बस्केळ्ळ पिस्सना पिस्वर दोर्कका मन्नो.

31 गानि मुन्ने मत्तोर वेल्लेटुर पज्जो आयानुर, पज्जोटोर मुन्ने आयानुर,” इंचि वेहतोर.

येसु ओना हामुरता बारेमते मर्रा उंदि मल्का वेहंतोर

32-34 येसु आनि ओनतोनि मत्तोर येस्सलेमतेके होंचेके मत्तुर. येसु अंतोर्कन्ना मुन्ने मत्तोर. ओना सिस्स्युल्क इचंत्रमते मत्तुर, ओना पज्जो ताकानुर वेंरिते मत्तुर. अस्के येसु ओना पन्नेंड सिस्स्युल्कुन बाजुंक ओसि, “हुळाट, मनम येस्सलेम होंचंतोम, अगा होत्ता पजा मनकना रूपमते पुटतोन नाकुन पेद्दा पेर्मालोर्कुना आनि दर्मसास्त्रम कराहना गुस्लकुना कय्दे पीसि हियानुर. ओर नाकु हामुर सिक्साता आदेस हीसि, यहुदि आयवोरा कय्दे अप्पजेपनुर. अस्के ओर नाकुन सिडांचनुर, नापोर्री उस्कानुर, पोट्टेते तन्नानुर, हक्कानुर. गानि मूड रोजकुंक नना मर्रा जीवाते तेदंतन,” इंचि मुन्ने जर्गना बारेमते सिस्स्युल्कुंक मर्रा वेहतोर.

याकोब, योहान येसुन विनंति कीतुर

35 पजा जब्दिना मर्क याकोब आनि योहान येसुनगा वासि, “गुरु, मोमोट बतल अय्ते तल्कंतोम अदुन माहाटी निमे कियमळ गावाले इंचि मा मनसु मंता,” इंचि इत्तुर.

36 येसु ओर्कुन इल्हा इत्तोर. “मीहाटी नना बतल कियाना इंचि मीवा मनसु मंता,” इंचि पूसकीतोर.

37 अस्के ओर, “निमे नीवा महिमाते राज्येम कियनेके नीवा तिना बाजुंक वरोन, डेमा बाजुंक वरोन उद्दाहीम,” इंचि येसुन इत्तुर.

38 गानि येसु ओर्कुन, “मिमेट बतल पूसकीसंतोरो अद मीक तेळियसेक हिल्ले. नना बव कस्टाल्क अय्ते बोगांचना मंता, अबुन मिमेट बोगांचा परकिटा? हिलाकौंटे नना बद बापतिस्मा एतंतनो, अद मिमेट एता परकिटा?” इंचि पूसकीतोर.

39 अस्के “हो, मोमोट तयार मंतोम,” इंचि ओर इत्तुर. अस्के येसु ओर्कुन इल्हा इत्तोर, “नना कस्टाल्क बोगांचताप मिमेट बोगांचा परकिट आनि नना एताना बापतिस्मा मिमेटगुडा एता परकिट.

40 गानि नावा तिना बाजुंक आनि नावा डेमा बाजुंक उपिचचना अदिकार नाक हिल्ले. अव जेगां बोराहाटी अय्ते तयार कीसि मंतांगो, ओरे अगा उद्दंतुर,” इत्तोर.

41 ओर इत्ता पोल्लें केंजसि, अगा मत्ता कळमता पदि मंदि सिस्युल्क, याकोब, योहानुना पोरो होंग आतुर.

42 अस्के येसु सिस्युल्कुन ओना दग्गेरा केय्शि, “यह्दि आयवोरा राजालोर ओरा जीतागाहकुन, ओरा कय्दा हिळ् इरालय हळंतुर, अल्हेने ई दुनियाता पेद्दा मनकालोरगुडा सिन्ना मनकालोरपोरो अदिकारम ताकसालय हळंतुर, इद मीकु एर्के.

43 गानि मिमेट मात्रम ओरालेसीं कियानायो. मी लोप्पोटाल बोर अय्ते पेद्दा आयालय हळांतोरो, ओर मीवा सेवा कियानोर आयापीता.

44 अल्हेने मी लोप्पोटाल बोर अय्ते लीडर आंतन इंतोरो, ओर मीवा दासुड आयापीता.

45 बारित्ते मनकना रूपमते पुटतोन नना सेवा कियगोटकुनालय वाया हिल्लेन गानि वैरेतोरा सेवा कियालय आनि वेल्लेटोर्कुन पापमताल पेचाहलय ओराहाटी नावा जीवा हियालय वातन,” इत्तोर.

गुडिड बरतलमयना कळकुंक नदर वायमळ

46 पजा येसु, ओना सिस्स्युल्कु यरिहो सहरते एव्तर. अगटाल मर्रा पेय्सनेके लोकुल्कुना पेद्दा मंदा ओरतोनि पेय्सता. तिमाउसना मर्रि बरतलमय इनानोर गुडिड बिच्चागाड हर्दा पक्काते उद्दिदिसि मत्तोर.

47 नासरेत सहरता येसु इगोटाल होंचेके मंतोर इंचि ओन्क तेळियतस्के ओर, “येसु, दाविद राजाना वंसमतोना! नापोर्री दया कीम,” इंचि जोरसे वरगेयतोर.

48 अस्के वेल्लेटुर लोकुल्क ओन, “चुपचाप मन” इंचि रांगतुर, गानि, “दाविद राजाना वंसमतोना, नापोर्री दया कीम,” इंचि ओर जोरसे मोत्कुनालय दलगतोर.

49 अस्के येसु आगसि, “ओन केयट,” इंचि इत्तोर. अस्के ओर आ गुडिडन केय्सि, “दैरनेम इर्रा, येसु नीकुन केयसंतोर तेदा,” इंचि इत्तुर.

50 अस्के ओर मुच्चुंकि मत्ता कप्पिडतुन तेंडसि पोहचि बिराना तेदसि येसुनगा वातोर.

51 अस्के येसु ओन, “नना नीहाटीं बतल कियना इंचि नी मनसु मंता?” इंचि पूसकीतोर. अस्के, “गुरु, नावा कळकुना नदर दिस्सानाल कीम,” इंचि येसुन इत्तोर.

52 अय्ते येसु, “निमे होन, नीवा विस्वासमे नीकुन बेस कीता,” इंचि इत्तोर. अल्हा इत्ता इनुडे ओना कळकुंन नदर वासि ओरगुडा येसुना पज्जो होत्तोर.

11

येसु येस्सलेम होनमळ

1 पजा ओर अंतोर येस्सलेम सहरता दग्गेरा जय्तुन मराकुना गुट्टापोर्री मनना बैतपागे आनि बेतानिया इनना नाहकुना दग्गेरा एव्तर. पजा येसु ओना इव्वुर सिस्स्युल्कुन केय्सि,

2 ओर्क इल्हा वेह्चि नाटे लोहतोर. “मी मुन्ने दिस्सना नाटे होंट. अद नाटे होळियता होळयुळे, बस्केने बोरे उद्दुवद उंदि गाडदि पोरि दोह्चि मत्तद मीकु दिसंता, दान लेहकुंकि पीसि वट्ट.

3 ओक्कला अदुन पीसि वायनेके, इल्हा बारि कीसंतरि? इंचि बोरन्ना पूसकीते, सामिक दीना अब्सरम मंता इंचि वेहट. अस्के ओर बिराना अदुन इग्गे लोहानुर,” इत्तोर.

4 येसु वेहताप ओर अद नाटे होत्तुर. अगा हर्दा पक्काते उंदि लोता तल्पुना दग्गेरा गाडदि पोरि दोहचि मत्तद ओर्क दिसता. अस्के अदुन लेहतुर.

5 अगा नित्तिसि मत्तुर इच्चुर लोकुल्क ह्ळसि, “मिमेट बतल कीसंतिर? गाडदि पोरिन बारि लेहसंतिर?” इंचि पूसकीतुर.

6 ओर येसु वेहतापे ओर्क वेहतस्के, आ लोकुल्क ओर्कुन होना हीतुर.

7 ओर अद गाडदि पोरिन येसुनगा तच्चि, दानपोर्री ओरा कपडिं वाटतुर. अस्के येसु दानपोर्री उदूतोर.

8 वेल्लेटुर लोकुल्क ओर केर्ता कपडिं तेंडसि, येसु होनना हर्दे तारतुर. इंचिच्चुर लोकुल्क अय्ते नेलिने मत्ता मराकुना कोम्मां नर्किसि हर्दे तारतुर.

9-10 येसुना पज्जो-मुन्ने ताकाना लोकुल्क वरगेयसेके इल्हा इनुंदुर, “सामिना पोरोलते वायानोंक, पेनदा आसिर्वाद दोर्किकाटी, होसन्ना! होसन्ना!* दाविदनालेसी राज्येम क्रियालय वायानोंक, पेनदा आसिर्वाद दोर्किकाटी, स्वर्गमते मंदना पेनदुक दन्यवाद,” इंचि इत्तुर.

11 इल्हा येसु येस्सलेम सहरते होळियतोर. पजा गुळितगा होंचि, सुट्टु अन्नि वस्तुकुन तिरियसि ह्ळतोर. पोळ्दु होत्ता इंचि ओना पन्नेड सिस्युल्कुन पीसि बेतानिया नाटे होत्तोर.

पंडि हिलुवा अंजिर मरा

12 इंकुंदि रोजु येसु बेतानिया नाटेनाल वायनेके ओन्क कर्वेस्ता.

13 हरदाल इच्चुर लक्कु उंदि पच्चटा अंजिर मरातुन ह्ळसि, दानकु पंडिं मंतां बारे इंचि आ मरातगा होत्तोर. गानि आ मराकु आर्किं तप्पा बतांगे मनाहिल्लें. बारित्ते अद पंडिं हादाना वेला आयो.

14 अस्के येसु अद मरातुन, “इंदकेटाल नीवा पंडिं बस्केने बोरे तिन्नुर,” इंचि इत्तोर. अद पोल्लेतुन ओना सिस्युल्कु कैजतुर.

गुळितगा अम्मानोर्कुन येसु गेदमंतोर

15 ओर येस्सलेम एव्ता पजा येसु गुळिते होत्तोर. अगा गुळिते बोर अय्ते अम्ममळ-अस्सुड कीसेक मत्तुर, ओर्कुन पलाते गेदुमतोर. अल्हेने कोत्तां अदला-बदला क्रियानोरा बल्लन आनि मोक्कु हियालय पावरेम पिट्टें अम्मानोर्कुना कुर्सिन मिळहाचि वाटतोर.

16 अल्हा कीसि गुळिताल बोने बदे वस्तु पीसि होनुळ-वायुळ क्रिया हिया हिल्लोर.

* 11:9-10 होसन्ना इत्ते-पेनदुन तल्सकुनमळ.

17 पजा ओर्क इल्हा वेहालय दलगतोर. “नावा लोतुन दुनियाता अंटोर लोकुल्क पारतना कियाना जेगा इनानुर, इंचि दर्मसास्त्रमते रासि हिल्लेना? गानि मिमेट दीन दोगाल्क मक्कना जेगा कीतिर,” इत्तोर.

18 इल्हा अंटोर लोकुल्क येसु वेहाना पोल्लें केंजसि इचंन्रम आयुंदुर. अदुनहाटीं पेर्मांलोर, दर्मसास्त्रम कराहना गुस्ल्क येसुन हक्कालय हळुंदुर. गानि ओन अल्हा बतलन्ना कियालय ओर वेरियुंदुर.

19 पजा येसु, ओना सिस्युल्कु पोळ्दु होत्तारिते येस्सलेमताल पेय्सि होत्तुर.

वतसि होत्ता अंजिर मरा

20 इंकुंदि रोजु हक्केरेने मर्रा येस्सलेमतेके वायानेके ओर अद अंजिर मरातुन हळतुर, अस्के अद मरा हिहकुनाल अय्ते कोस्सादाका पूरा वतसि होंचि मत्ता.

21 येसु अद मरातुन इत्ता पोल्ले पन्नुंक मति वाता. अस्के ओर येसुन, “अद हळा गुरु!† निमे सापनेम हीता अंजिर मरा वतसि होत्ता,” इंचि इत्तोर.

22-23 अस्के येसु ओर्कु इल्हा जवाब हीतोर. “मिमेट पेनदापोरीं विस्वासम इर्राट. नना मीकु निजम वेहांतन, बोर्नना इद गुट्टातुन, ‘इग्गेटाल तेदसि समुद्रमते होंचि अर्रा’ इंचि बतले अनमानम हिलाकोटा विस्वासमते इनानय्ते, अद होंचि अर्रा.

24 अदुनहाटीं नना मीकु वेहांतन, मिमेट विस्वासमतोनि पारतनाते बतल तल्किना, अद मीकु दोर्कता इंचि विस्वासम कीम्टु, अस्के अद मीवादे आंता.

25 अल्हेने मीवा मनसुनेगिंटा बोना पोर्रीनना पगा मत्ते, मिमेट पारतना कियालय निततस्के मुन्ने ओन मापि कीम्टु. अस्के स्वर्गमते मंदना पेनबाबालगुडा मीवा तप्पुकुन मापि कीतोर.

26 मिमेटगिंटा इंकावरोना तप्पुकुन मापि कियाकोटे, स्वर्गमते मंदना पेनबाबालगुडा मीवा तप्पुकुन मापि किय्योर,” इंचि वेहतोर.‡

येसुना अदिकारमता बारेमते पूसकियमळ

27 ओर येस्सलेम सहरते मर्रा वातस्के, येसु गुळिते तिरियसेक मत्तोर. अस्के पेर्मांलोर, दर्मसास्त्रम कराहना गुस्ल्क आनि यहुदि पेद्दाल्क येसुनगा वातुर. वासि,

28 “निमे ई कबाहक बद अदिकारमते कीसंतिन? नीकु ई कबाहक कियालय अदिकारम बोर हीतोर?” इंचि पूसकीतुर.

† 11:21 गुरु गुरु, रब्बी उदे पोल्ले आंदुर.

‡ 11:26 इद वचनम कोन्नि पांडु लिपिने हिल्ले.

29 अस्के येसु ओर्कुन इत्तोर. “ननागुडा मीकुन उंदि सवाल पूसकींतन. मिमेट जवाब हियानय्ते, नना बद अदिकारमते इव कबाहक कीसंतन इत्तद वेहंतन.

30 अय्ते जवाब हीम्टु, योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकोटे मनकालोराहेंदाल दोर्कतना?” इत्तोर.

31-32 अस्के, ओर-ओरे इल्हा वळ्ककुनालय दल्गतुर, “ओक्कला स्वर्गमताल दोर्कता इंचि मनम इनानय्ते, ‘मिमेट योहानुन बारि नम्मिर’ इंचि इनानुर. ओक्कला मनम मनकालोराहेंदाल दोर्कता इनानय्ते, लोकुल्लकुना वेंरे! बारिल्ते योहान निजमे पेनदा कबुरतोर इंचि ओर नम्मांतुर,” इत्तुर.

33 अदुनहाटी ओर, “माक एका हिल्ले,” इंचि इत्तुर. अस्के, “अल्हा अय्ते, इव कबाहक बद अदिकारमते कीसंतनो ननागुडा मीकु वेहोन,” इंचि येसु इत्तोर.

12

1 अस्के येसु ओर्कु उंदि वेसुडि वेहमळ सुस्व कीतोर, “वरोर मनकल अंगुर तोटा कीतोर. आ तोटा सुट्टु ग्रे दोहाचि तोटाता लोप्पेन अंगुर पंडिना पानकम तेंडालय उंदि पोक्का तञ्जि, दाना दगोरेने कावेलहाटी उंदि मंडा वाटतोर. पजा तोटातुन वेंरेतोर्क बटाइक हीसि, वेंरे देसेम होत्तोर.

2 पजा बस्के अय्ते अंगुर पंडिं कोय्याना वेला वाता, अस्के ओरागटाल पंडिना तूस एतालय ओना वरोर दासुन बटाइतोरहेके लोहतोर.

3 गानि बटाइतोर आ दासुन पीसि पक्का तंचि, उत्ता कय्के वापस लोहतुर.

4 पजा मालक इंकावरोन दासुन बटाइतोरहेके लोहतोर. आ बटाइतोर ओना तल्ला पयाहचि ओन कदर हिलाकोटा कीसि लोहतुर.

5 मालक मर्रा इंकावरोन दासुन ओरहेके लोहतोर, ओर ओन हक्कतुर. अस्के मालक इल्हा इंका वेल्लेन दासुल्लकुन लोहतोर. गानि बटाइतोर इच्चुर्कुन तंतुर, इच्चुर्कुन बारे हक्कतुर.

6 आकिरते मालकनगा ओना पावरमगल्ला मर्रि वरोरे मिगिल्सि मत्तोर. अस्के मालक, “नावा मर्रिन बेस कदर कियानुर” इनकुंचि ओरहेके लोहतोर.

7 गानि बटाइतोर ओर वायानद हळसि, “ईर अय्ते वारसदार आंदुर. दट ओन मनम हक्ककोम, अस्के ओना जायदाद मनाक आयार,” इंचि वरोंक-वरोर इत्तुर.

8 पजा ओन दोर्कापीसि हक्किसि, तोटाता पलाते ओसि पोहचीतुर.

9 इंदके अंगुर तोटाता मालक वासि ओर्कुन बतल कियानुर? ओर वासि बटाइतोर्कुन हक्किसि अद तोटातुन वेंरेतोर्क अप्पजेपनुर,” इत्तोर.

10-11 पजा येसु ओर्कुन इल्हा इत्तोर. “मिमेट दर्मसास्त्रमते बस्केन हदवा हिल्लिरा?

“बद बंडातुन अय्ते मिस्त्रिलक, कबळक ओज्जो इंचि हय्सा हिल्लुर,
अदे बंडा, सेंकु मूलाता पुनादि बंडा आता.

इद सामि कीता कबळ आंद, इद मना नदरते इचंन्रमाता कबळ आंद,” इत्तोर.

12 पजा दर्मसास्त्रम कराहना गुरूक आनि पेद्दा पेर्मालोर्क, येसु वेहता वेसुडि केंजसि, “ईर मनाकुने इंचंतोर,” इंचि एरपाट कीतुर. अदुनहाटी ओर येसुन दोर्का पियालय हळतुर. गानि लोकुलकुना वेंरेक ओन पिय्याकेन होळसि होत्तुर.

कैसर राजांक कर दोहना बारेमते

13 पजा, येसुन ओना पोल्लेन लोप्पेन दोर्का पिय्याना इंचि इच्चुर परिसिल्लुकुन आनि इच्चुर हेरोद राजाना मनकालोर्कुन येसुनगा लोहतुर.

14 ओर येसुनगा वासि इल्हा इत्तुर. “गुरु, निमे निजम वळ्कानोन आदिन, बोर बतल इनिनागानि दाना पिकिरगुडा किय्यिन, निमे लोकुलकुना मोकम हळसि वळ्किकन, इंका पेनदा हर्दा बारेमते सत्तेमते कराहंतिन इंचि माक एरपाटे मंता. इंदके माकु वेहा, नियम परकारम, कैसर* राजांक कर दोहमळ न्यायमेना, आयोना?” इत्तुर.

15 येसु ओरा मनसुना कराब पिलान एरपाट कीसि, ओर्कुन इल्हा इत्तोर. “मिमेट बारि नावा पट्टु हळ्यांतिर? नाकु उंदि एंडि बंडि हुप्सट,” इत्तोर.

16 ओर उंदि एंडि बंडि हुपिस्तुर. अस्के येसु ओर्कुन इल्हा इत्तोर. “इद एंडि बंडिपोर्नी बोना पोटुवा आनि पोरोल मंता?” इत्तोर. “कैसर राजानद” इंचि ओर इत्तुर.

17 पजा येसु, “बद कैसर राजानद मंता, अद कैसर राजांक हीम्टु. बद अय्ते पेनदाद मंता, अद पेनदुक हीम्टु,” इंचि ओर्कुन इत्तोर. अस्के ओना पोल्लेन केंजसि ओर वेल्लेने इचंन्रम आतुर.

सदुकिर येसुन पसांचालय हळंतुर

18 इच्चुर सदुकिर येसुनगा वातुर (हासि मरी जीवाते तेदमळतुन ईर नम्मुर.) वासि इल्हा सवाल पूसकीतुर.

* 12:14 कैसर इद राजाना पोरोल आयो. रोम सरकारते अन्तिकन्ना पेद्दा पदवि आंद.

19 “गुरु, मूसाना नियम परकारम, वरोर मनकल पिलाल्क आयाका मुन्नेन हासि होंचि ओना मुत्तो मत्ते, दानतोनि ओना तम्मुर मरमिं आसि, हातोना वंसमताहाटीं पिलाल्क कनना इंचि रासि मंता.

20 अय्ते, एडुर दादाल-तम्मुह्क मत्तुर. ओरा लोप्पोटाल पेद्दु दोड मरमिं आतो, गानि पिलाल्क आयाका मुन्नेन ओर हातो.

21 हातस्के ओना पज्जोटर दानतोनि मरमिं आतो, ओरगुडा पिलाल्क आयाका मुन्नेन हातो. अल्हेने ओना पज्जोटरगुडा दानतोनि मरमिं आतो, ओरगुडा पिलाल्क आयाका मुन्नेन हातो.

22 इल्हा ओर एडुरगुडा दानतोनि मरमिं आसि पिलाल्क आयाका मुन्नेन हातुर. आकिरते अद मुरतळगुडा हाता.

23 अय्ते हातो अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते ओर एडुरगुडा दान मरमिं आसि मत्तुर,” इत्तुर.

24 अस्के येसु ओर्कुन इल्हा इत्तोर. “मिमेट दर्मसास्त्रमतुन आनि पेनदा ताकततुन एरपाट कियाका दान मिमेट तप्पु अर्तम कीकुंचित्तिर.

25 बारित्ते ओर हामुरताल जीवाते तेदानुर अस्के, ओर मरमिं आयुर, मरमिं कीसिगुडा हिय्युर. गानि ओर स्वर्गमता पेनदा दूतनलेसीं मनांतुर.

26 हातुर मर्रा जीवाते तेदाना बारेमते पेन, ‘नना अब्राहामुना पेनदुन, इसाकुना पेनदुन आनि याकोबुना पेनदुन’ इंचि दर्मसास्त्रमते पोत्तना पोदाता गटना जर्गनिके मूसांक वेहता, अदुन मिमेट हदवा हिल्लिरा?

27 अद हातोरा पेन आयो गानि जीवाते मत्तोरा पेन आंद. मिमेट वेल्ले तप्पु कीसेक मंतिट,” इंचि इत्तोर.

अन्निकन्ना पेद्दा आदेस

28 ओर वदुरकुंचेक मत्तद केंजसि, अच्चोटेन वरोर दर्मसास्त्रम कराहना गुरु अगा वातो. येसु ओर्क बेस जवाब हीतद हळसि, “गुरु, पेन हीता आदेसकुनाल मेन आदेस बंद आंद?” इंचि पूसकीतो.

29 अस्के येसु ओन्क इल्हा जवाब हीतो. “ए इस्राएल! इद केंजा, अन्नि आदेसकुनाल इद मेन आदेस आंद: मावा पेने सामि आंदुर.

30 निमे नीवा सामि आता पेनदुन पूरा मनसुनाल, पूरा आत्माताल, पूरा बुद्दिताल, पूरा ताकतताल पावरम कीम.

31 रोंडो आदेस बद् इत्ते, नीवद निमे बच्चोन पावरम कीतिनो, अचोने पावरम इंकावरोगुडा कीम. इव रोंडुन होळसि वेंरे पेद्दा आदेस बद्दे हिल्ले,” इत्तोर.

32 अस्के दर्मसास्त्रम कराहना गुरु येसुन, “गुरु, निमे सत्तेम वळकतिन. पेन उंदे आंद, दान्क तपिच्चि इंकुंदि पेन हिल्ले.

33 अदुनहाटीं कमुरबलिं कियानदानकन्ना, मोक्कुल्क हियनदानकन्ना पूरा मनसुनाल, पूरा आत्माताल, पूरा बुद्दिताल, पूरा ताकतताल मनम पेनदुन पावरम कियमळे बेस आंद. अल्हेने मनद मनम पावरम कीतच्चोने इंकावरोगुडा पावरम कियना.” इंचि इत्तोर.

34 अल्हा ओर तेल्विते वेहतद केंजसि येसु ओन, “निमे पेनदा राज्येमकु वेल्ले लक्कु हिल्लिन,” इंचि इत्तोर. दाना पजा येसुन बद्दे सवाल पूसकियालय बोर्कु हिम्मत आयाहिल्ले.

किरिस्तु बोना मरिं आंदुर?

35 येसु गुळिते पेनदा पोल्ले कराहनेके ओर्कुन इल्हा इत्तोर. “किरिस्तु दाविदना मरिं आंदुर, इंचि दर्मसास्त्रम कराहना गुस्लक बल्हा इना परांतुर?” इत्तोर.

36 इद पोल्लेतुन कुद दाविद पवित्र आत्माते निंडसि इल्हा इत्तोर,
“बदवेरदाका अयते नीवा पगातोर्कुन, नीवा काल्कुनगा तर्रान,
अदवेरदाका नावा तिना बाजुंक उद्दिदिसि मन,

इल्हा सामि, नावा सामिन इत्तोर.”

37 इल्हा दाविद ओन, सामि इंचि इत्तोर. अयते किरिस्तु दाविदना मरिं बल्हा आया परांतोर? इत्तोर. अगा मत्ता लोकुल्क येसुना पोल्ले बच्चोरो गम्मतते केंजतुर.

दर्मसास्त्रम कराहना गुस्लकुनलेसीं किया मनि

38 येसु ओर्क कराहसेके इल्हा इत्तोर. “दर्मसास्त्रम कराहना गुस्लकुनाल उसारते मंटु. पोर्रीटाल हिळदाका पोळ्गु अंगिं केर्सिं तिरियमळ, हाटुमकुने जोहार वेहागोटकुनमळ ओर्क बेस अनपिच्चंता.

39 इंका दर्मसास्त्रम कराहना लोहकुने, कुळपुकुने पेद्दाल्क उद्दाना जेगाते उदमळ इत्ते ओर्क वेल्ले इस्टम.

40 ईर मुंडामोस्ता मुर्ताह्कुन मुळहंतुर, लोकुल्कुंक हुप्सालय वेल्लेनजेम पारतना कीतुर. गानि ईर्क मात्रम पेन अंटोर्कन्ना एक्को सिक्सा हियार,” इंचि इत्तोर.

मुंडामोस्ता मुरतळ रोंडु कोत्तां वाटमळ

41 येसु गुळिते दान पेटिता मुन्ने उद्दिदसि, लोकुल्क दान पेटिते कोत्तां वाटनद हळसेक मत्तोर. वेल्लेटुर सिरमंत लोकुल्क वेल्लेने कोत्तां वाटतुर.

42 पजा मुंडामोस्ता उंदि गरिब मुरतळ वासि रोंडु रागि कोत्तां वाटता. अबुना विलुवा वेल्ले तक्को मत्ता.

43-44 अस्के येसु ओना सिस्स्युल्कुन दग्गेरा केय्से इल्हा इत्तोर. “नना मीक निजम वेहांतन, ई मुंडामोस्ता गरिब मुरतळे अंटोर्कन्ना एक्को दानम कीता. बारित्ते इग्गे सिरमंत लोकुल्क ओरा दनमताल दानम कीतुर, गानि इद गरिब मुंडामोस्ता मुरतटगा रोंडे रागि कोत्तां मत्तां. अद अबुनगुडा इत्ते दाना पिस्वरताहाटीं इरतादानगुडा पेनदुक वाटसीता,” इत्तोर.

13

गुळि नासडेम आयाना बारेमते येसु वेहमळ

1 येसु गुळिताल पलाते पेय्से वातस्के ओना सिस्स्युल्कुनाल वरोर सिस्स्युड येसुन, “गुर्, हळा! बच्चोर पेद्दा बंडां, बच्चोर बेसता बंगलां,” इंचि इत्तोर.

2 अस्के येसु ओन इल्हा इत्तोर. “बंडाने दोहतव पेद्दा-पेद्दा बंगलां हळसेक मंतिन गदा, अव बंडां उंदानपोर्ी उंदि मनाकोंटा कूल्हाना वेला वायनद मंता,” इत्तोर.

3 येसु अगटाल पेय्से गुळिकु मुन्ने मंदना जय्तुन मराकुना गुट्टापोर्री होंचि उदतोर. ओर ओटिगा मत्तद हळसि, पत्रु, याकोब, योहान आनि अंदरियल ओनगा होत्तुर.

4 होंचि, “इवनि गटनां बस्के जर्गनुं माक वेहा. इंका इव गटनां जर्गना मंता इन्नेके माकु बतल चिन्ह दिस्सार?” इत्तुर.

5 अस्के येसु ओर्कु इल्हा वेहालय दल्गतोर, “मीकुन बोर पसांचकोंटा मिमेट उसारते मंटु.

6 नावा पोरोल एतसेके बचुटूरो लोकुल्क वांतुर. वासि, ‘ओन ननाने आंदुन’ इंचि वेल्लेटोर्कुन पसांचनुर.

7 मिमेट लडाईं आनि लडाईना पोल्लेना बारेमते केंजसि वेरियमट, अल्हा तप्पाकोंटा आयानुगे. गानि दुनियाता आकिर वेला अस्केने वायो.

8 देसेमपोर्ी देसेम, राज्येमपोर्ी राज्येम लडाईं आयनुं, वेरे-वेरे जेगाने बूकपाल्क आयनुं, कर्बु अरार. गानि इल्हा आयमळ इत्ते एर पूरालय नोप्पि सुस्व आताप आंद.

9 गानि मिमेट उसारते मंटु. बारित्ते मीकुन पंचादितोरा कय्दे अप्पजेपनुर आनि दर्मसास्त्रम कराहना लोहकुने ओसि तनानुर. पजा नावा बारेमते गवाइ वेहालय मीकुन राज्यपाल आनि राजालोरा मुन्ने निलाहनुर.

10 गानि दीनकन्ना मुन्ने अन्नि देसेल्कुने तप्पाकोटा पेनदा बेसता कबुर वेहमळ जर्गगोम.

11 अद वेलाते मीकुन पीसि ओसि पूसकियानुर. अस्के अगा बतल वळकना, बतल वळकानायो इंचि मोदाले रंदि कियमट. वळकानोर मिमेट आयो गानि पवित्र आत्मा आंद. अदुनहाटीं मीवा मनसुने बतल वळकागोम इंचि अनपिचंतनो अदे वळकट.

12 इका बल्हा जर्गता इत्ते, कासा तादल-तम्मूहक पगां आसि हक्कालय अप्पजेपनुर. पिलालक ओरा तल्लुर-बाबोक अड्डम तिरियसि ओर्कुन हक्का वेहांतुर.

13 नावा पोरोलताहेंका अंटोर लोकुलक मीकुन हय्सुर. गानि बोर अय्ते पेनदापोरोटा विस्वासमते आकिरदाका निल्सि मनंतोर, ओनके मुक्ति दोर्कार.

14 गानि बस्के अय्ते, बोरे हय्सवसोंटा नासडेम कियाना वस्तु, गुळि लोप्पो बगा अय्ते मंदनायो अगा नित्तिसि मत्तद मिमेट हळकिर, अस्के बोर अय्ते यहुदिया एरियाते मंतुरो, ओर गुट्टनहेके वित्तिर (हद्वानोर इदुन अर्तम कीकुट्टु)

15 बोर अय्ते लोतपोरो मंतोर, बवे वस्तुक पीसि वायालय लोप्पो होळियानायो.

16 बोर अय्ते नेलिने कबळ कीसेक मंतोर, कपडिं पीसि वायालय मल्सि लोन होनानायो.

17 अव रोजकुने पीटे मत्ता मुर्ताहकुंक आनि सिन्ने मर्तल्लुहकुंक वेल्लेन तकलिप वांता.

18 अव तकलिपकु पीनि कालमते वायामन्नि इंचि पारतना कीम्टु.

19 बारित्ते पेन कीता ई दुनिया पुट्टस्केटाल अय्ते इदवेरादाका बस्केन वायवसोंटा तकलिप अव रोजकुने वायाना मंता आनि मुन्नेगुडा असोंटा तकलिप बस्केने वायो.

20 ओक्कला सामि अव रोजकुन तक्को कियाकोटा मंचि मत्ते, बोरे पिसाकोन्नेर. गानि बोर्कुनय्ते पेन पेरता, ओराहाटीं अव रोजकुन तक्को कीता.

21-22 अव रोजकुने आबद्दम किरिस्तुलक, पेनदा आबद्दम कबुरतोर वायानुर. आनि कुदुरते पेन पेर्कुत्ता लोकुलकुन पसांचलय चिन्हां, इंचंत्रमता कबाहक कीसि हृप्सानुर. अदुनहाटीं ओक्कला बोरन्ना मीकुन, 'हृळाट, किरिस्तु इगे मंतोर, अगा मंतोर' इनानय्ते मिमेट ओर्कुन नम्मूमट.

23 गानि मिमेट उसारते मंटु; इव अन्नि पोल्लें नना मीक मुन्नेने वेहचीतन.

24 गानि अव रोजकुने तकलिपकु मारतस्के पोळ्दुंक हीकट मुच्चका वायार, वेळसि वेल्गु हियाकोंटा आयार.

25 मब्बुनाल सुक्कां हिल्ह अरानुं, मब्बुने मनना अन्नि सक्तिन कदलिचमळ जर्गता.

26 अस्के मनकना रूपमते पुटतोन नना, पेद्दा बलम आनि महिमातोनि मब्बु तेर्पेनपोर्री उद्दिदिसि वायानेके लोकुल्क ह्ळानुर.

27 अस्के नना नावा दूतन बूमिपोर्री लोहांतन. आ दूतां बूमिपोर्री नालुं मूलानाल, मब्बुना ई कोस्साताल अय्ते आ कोस्सादाका नना पेर्कुल्ता लोकुल्कन जमा कीतां,” इत्तोर.

येसुना मल्सि वायाना बारेमते वेहमळ

28 “अंजिर मराताल उंदि पोल्ले करियट. अंजिर मराता कोम्मांक इग्गुर बस्के अय्ते वांता, अस्के एद्दि कालम दग्गेरा एव्ता इंचि मिमेट एरपाट कीतिर.

29 इल्हा इव अन्नि गटनां जर्गनद ह्ळसि ओर दग्गेरा मंतोर, गल्मातगेन मंतोर इंचि मिमेट एरपाट कीतिर.

30 नना मीकु निजम वेहांतन, बदवेरदाका अय्ते इव अन्नि पोल्लें पुरागा आयोंगो, अदवेरदाका ई पीळि मुळगो.

31 इद बूमि, मब्बु नासडेम आसि होंदार, गानि नावा पोल्लें बस्केने नासडेम आयों.

अद वेला बोनके तेळियो

32 “अद रोजु आयि, अद गळिया आयि बोर्के तेळियो. स्वर्गमता दूतांक आयि, मनकना रूपमते पुटतोन नाकु आयि बोर्के तेळियो. गानि सिराप पेनबाबांके तेळियंता.

33 अद वेला बस्के वांतानो मीक तेळियो. अदुनहाटीं मिमेट तेल्चिते, उसारते मंटु.

34 इद वरोर मनकनलेसी मंता, बोर अय्ते पय्नेम होनाका मुन्ने, ओना जीतागाह्कन केय्सि, बोना कबळ ओनकु अप्पजेपसि, लोतुन कावेल कियानोन ‘तेल्चिते मन’ इंचि आदेस हीतोर.

35 लोता मालक पोळ्द होंचि वांतोरु, नळजाम नर्का वांतोरु, गोगोड कूसानेके वांतोरु, हक्केरे वांतोरु, बस्के वांतोरु मीक एरपाट हिल्ले. अदुनहाटीं मिमेट तेल्चिते मंटु.

36 ओर अचानक वासि, मीकुन निद्र होंचि मत्तद ह्ळा मनि इंचि मिमेट तेल्चिते मंट.

37 इद नना मीक वेहतन, अल्हेने अंटोर्कगुडा अदे वेहासेक मंतन. तेल्चिते मंट,” इंचि येसु ओर्क वेहतोर.

14

येसुन हक्कना पिलान कीतुर

(मत्तयाल 26:1-5; लूकाल 22:1-2; योहान 11:45-53)

1 रोंडु रोजकुना पजा दाटसि होनना पंडुगु आनि पुल्लगा आयवा पिडिता हारिना पंडुगु आयाना मत्ता. अस्के येसुन सप्पुडदाका दोर्कापीसि हक्ककोम इंचि पेर्मालोर्क, दर्मसास्त्रम कराहना गुस्लक पिलान कीसेक मत्तुर.

2 गानि, “पंडुगु रोजकुना लोप्पो हक्का मन्नि, अल्हा कीते लोकुलक गडबड किया परांतुर,” इंचि ओर इनकुत्तुर.

येसुना तल्लापोर्रो अत्तर निय वळियमळ

(मत्तयाल 26:6-13; योहान 12:1-8)

3 अद वेलाते येसु बेतानिया नाटे, मुन्ने कुस्टरोगम आसि मत्ता सिमोनुना लोते गाटो तिनालय उद्दिदेसि मत्तस्के, उंदि मुरतळ तेल्लाटा बंडा गुर्गिते जटामासि* मराताल तयार कीतद, वेल्ले दराता पिक्वर अत्तर निय पीसि वाता. अद गुर्गिता बुच्चातुन पयाहचि येसुना तल्लापोर्रो वळियता.

4 अदुन ह्ळसि, अगा मत्तोर्क इच्चुर्कु होंग वासि, “इद अत्तर निय अट्टिदे बारि नासडेम कीतिन?

5 इदुन अम्मिसि मत्ते मूड नुहकुंकन्ना एक्को एंडि रूपे वायवहकु. अवुन गरिब लोकुलकुंक हियालय ओज्जुवाहक,” इंचि दान तेराहतुर.

6 गानि येसु ओर्कुन इल्हा इत्तोर. “दीन बतल इनमट, मिमेट दीन बारि तकलिप कीसांतिर? इद नावाहाटीं बेसे कीता.

7 गरिब लोकुलक मीवातोनि बस्केळक मनंतुर, मिमेट बस्के इनकुत्ते अस्के ओर्क बेस किया परांतिर, गानि नना मीवातोनि बस्केळक मन्नोन.

8 नावा मेंदुल्लतुन बौदा दोस्साका मुन्नेने अद मुरतळ नाक निय होकता. अद किया परतच्चोन कीता.

* 14:3 जटामासि जटामासि पोरोलता उंदि सेंट मरा.

9 नना मीक निजम वेहांतन. पूरा दुनियाते बगा-बगा पेनदा बेसता कबुर वेहमळ जर्गता, अगा ई मुरतदुन आनि इद कीता कबळतुन मति कियानुर,” इतोर.

इस्करियोत यहदल येसुन पीसि हियालय ह्ळांतोर
(मत्तयाल 26:14-16; लूकाल 22:3-6)

10 पजा, पन्नेड सिस्स्युल्कुनाल वरोर इस्कारियोत यहदल मत्तोर. येसुन पीसि हियालय ओर पेद्दा पेर्मांलोरगा होत्तोर.

11 अद केंजसि ओर कूस आसि, ओन्क कोत्तां हीतोम इंचि ओप्कुत्तुर. अदुनहाटीं ओर येसुन पीसि हियालय मोका हळसेक मत्तोर.

सिस्स्युल्कु पंडुगुना गाटो तयार कीतुर
(मत्तयाल 26:17-25; लूकाल 22:7-14,21-23; योहान 13:21-30)

12 पुल्लगा आयवा पिंडिता हारिना पंडुगुना मोदाटा रोजु, दाटसि होनना पंडुगुना गोर्रे पोरिन मोक्कु हियुंदुर. अदे रोजुने येसुना सिस्स्युल्कु, “गुरु, दाटसि होनना पंडुगुना गाटो तिनना तयारि बगा कीकोम इंचि नीवा मनसु मंता?” इंचि ओन इत्तुर.

13 येसु ओना इव्वुर सिस्स्युल्कुन केय्सि ओर्क इल्हा वेहिच लोहतोर. “मिमेट सहरते होंट. अगा वरोर मनकल अळकाते एर पीसि होननेके कलियंतोर, ओना पज्जेन होंट.

14 ओर बद लोन अय्ते दांतोरो, अद लोता मालकुन, ‘नना नावा सिस्स्युल्कुनतोनि कलियसि, दाटसि होनना पंडुगुना गाटो तिननाहाटीं हेळमितोर आगाना अर्रा बगा मंता? इंचि गुरु पूसकीसंतोर,’ इल्हा इंटु.

15 अस्के ओर मीकु मिद्दे पोर्रेटा पेद्दा अर्रा सजांचि तयार कीसि मत्तद हूपसानुर, अदे अर्राते पंडुगुना गाटो मनाहाटीं तयार कीम्दु,” इतोर.

16 सिस्स्युल्कु अगटाल पेय्सि सहरते होत्तस्के, ओर बल्हा वेहतोर अल्हेने अगा मत्ता, पजा ओर अग्गेन दाटसि होनना पंडुगुना गाटो तयार कीतुर.

17 पोळ्द होत्तारिते, येसु ओना पन्नेडु सिस्स्युल्कुनतोनि अगा वातोर.

18 ओर गाटो तिंचेके मत्तुर अस्के येसु, “नना मीक निजम वेहसेक मंतन, मीवा लोपोटाल वरोर नाकुन पीसि हीतोर, ओर नावातोनि उद्दिदसि गाटो तिंचेके मंतोर,” इंचि ओर्कुन इत्तोर. 19 अद केंजसि ओर्क वेल्लेन दुक्कम अनपिस्ता, ओर वरोन पज्जो वरोर, “ओन नना अय्ते आयोन गदा?” इंचि येसुन पूसकियालय दल्गतुर.

20 अस्के येसु, “ओर पन्नेड मंदिताल वरोर आंदुर, ओर नावातोनि गिन्नेते हारि मुळाहिचे तिनानोरे.

21 दर्मसास्त्रमते रासि मत्ताप, मनकना रूपमते पुटतोन नना अय्ते दांतने. गानि बोनाहेंदाल अय्ते नाकुन पीसि हियमळ जर्गता, आ मनकल पुट्टाकोर्टेन बेस आसि मनवळ,” इत्तोर.

सिस्युल्कुनतोनि आकिर मल्का गाटो तिनमळ

(मत्तयाल 26:26-30; लूकाल 22:14-20; 1 कुरेंति 11:23-25)

22 अल्हा ओर तिंचेके मनेकेने, येसु हारितुन येत्सि, पेनदुक दन्यवाद कीसि तुकडां कीतोर. अवुन सिस्युल्कुंक हीसि, “तिट, इद नावा मेंदुल आंद,” इंचि इत्तोर.

23 मर्रा ओर, उंदि तालिते अंगुर पानकम येत्सि, पेनदुक दन्यवाद कीसि ओर्क हीतोर. अदुन ओर अंटोर उट्टुर.

24 पजा, “इद करारता नावा नेत्तुर आंद, इद नेत्तुर वेल्लेटोराहाटीं पोंगागोटमळ जर्गता.

25 नना मीक निजम वेहांतन, पेनदा राज्येमते पूना तरिकाते अंगुर पानकम उनाना रोजुनदाका, मर्रा बस्केने अंगुर पानकम उन्नोन,” इंचि वेहतोर.

26 पजा ओर, पेनदा स्तुति कियाना उंदि पाटा पारसि, जय्तुन मराकुना गुट्टापोरें होत्तुर.

पत्रु आबद्दम वळकंतोर इंचि येसु वेहमळ

27 अस्के येसु ओर्कुन इल्हा इत्तोर. “गोरें कोहानोन नना हळकतन, मंदता गोरें बेंदव-हेके पायसि वित्तंतां, इंचि दर्मसास्त्रमते रासि मंता. अदुनहाटीं मिमेट अंटोर नाकुन होळसि वितकिर.

28 गानि, नना हासि मर्रा जीवाते तेदतंका, मीकन्ना मुन्ने गालिल एरियाते दांतन,” इत्तोर.

29 अस्के पत्रु, “अंटोर नीकुन होळसि वित्तिना गानि नना नीकुन होळसि वित्तोन,” इंचि येसुन इत्तोर.

30 अस्के येसु, “नना निजम वेहासेक मंतन, इय्याला नर्कळक रोंडु मल्कां गोगोड कूसाका मुन्ने, निमे नाकुन मूड मल्कां ‘एरपाट किय्योन’ इंचि इनकिन,” इंचि ओन इत्तोर.

31 गानि पत्रु इंका जोसने, “ओक्कला नाकु नीतोनि हामुर वायिना बेसे, नीकुन नना एरपाट किय्योन इंचि बस्केने इन्नोन,” इंचि इत्तोर. अद केंजसि, कळमतोरगुडा पत्रु इत्तापे इत्तुर.

येसु गेत्सेमनितगा पारतना कियमळ

32 अगटाल ओर गेतसेमनि इनना जेगातगा होत्तुर. अगा एवतस्के, “नना पारतना कियानादाका इग्ने उद्दिंसि मंटु,” इंचि ओना सिस्स्युल्लुकुन इत्तोर.

33 पजा पत्रुन, याकोबुन, योहानुन ओनतोनि ओतोर. येसु अद वेलाते वेल्ले दुक्कमते, सिम्मरा आतोर.

34 अस्के ओर्कुन, “नावा जीवा दांता बारे इत्ताप नाक वेल्ले दुक्कम आसेक मंता. मिमेट इग्ने आगसि, तेल्विते मंटु,” इंचि इत्तोर.

35 इच्चुर मुन्ने होंचि बोक्बोर्ले अर्सि पारतना कीतोर, “आया परते इद तकलिपता वेला तप्पि होन्नि.

36 बाबा! नावा बाबा, नीतोनि अन्नि आया परांता, इद तकलिपता वाटितुन लक्कु कीम. गानि नावा इच्चा मत्ताप आयो, नीवा इच्चा मत्तापे आयि,” इंचि इत्तोर.

37 पजा सिस्स्युल्लुकुनगा वासि हळते ओर निद्रा होंचि मत्तुर. अस्के येसु सिमोन पत्रुन इल्हा इत्तोर. “सिमोनु, मंचिगा मीडसंतरा? उंदि गंटामेडगुडा नातोनि तेल्विते मंदा परिना?

38 मिमेट पट्टुने अर्काकोटा मननाहाटी तेल्विते मंचि पारतना कीसेके मंटु, नना वेहताप कियालय मीवा आत्मा तयार मंता गानि मीवा मेंदुल कमजोर मंता,” इत्तोर.

39 अस्के येसु मरंदि मल्का होंचि, मुन्ने कीतापे मर्रा पारतना कीतोर.

40 येसु मर्रा वासि हळतस्के, ओर मंचि निद्रते मत्तुर. येसुंक बतल जवाब हियना ओर्क तेळिया हिल्ले.

41 येसु मूडोव मल्का ओरगा होंचि ओर्कुन इल्हा इत्तोर. “मिमेट इंदकेगुडा मीडसेक, आराम कीसेके मंतरा? इद वेल्लेन आता, मनकना रूपमते पुटतोनि नाकुन पापिर्कुना कयदे पीसि हियना वेला एव्ता.

42 तेदाट, मनम दाकोम. नाकुन पीसि हियानोर दग्गेरेन एव्तेर,” इत्तोर.

येसुन पीसि हियमळ

(मत्तयाल 26:47-56; लूकाल 22:47-53; योहान 18:3-12)

43 येसु वळकसेकेन मंतोर, अच्चोटेन पन्नेंड सिस्स्युल्लकुना लोप्पोटोर वरोर यहुदल वातोर. ओनतोनि पेर्मालोर्क, दर्मसास्त्रम कराहना गुस्लक, यहुदि पेद्दाल्क लोहचीता लोकल्लकुना पेद्दा मंदा ओर कसेहक, दुडुडुक पीसि वातुर.

44 येसुन पीसि हियानोर, “नना बोन अय्ते बुरीतनो, ओर येसु आंदुर. ओन दोर्कापीसि जेगर्ताते ओम्टु,” इंचि मुन्नेन ओर्क उंदि चिन्ह वेह्चि मत्तोर.

45 अदुनहाटीं ओर वाता वायुडे येसुनगा होंचि, “गुरु!” इंचि ओन बुरतोर.

46 अस्के ओर ओनापोर्रीं कय वाट्सि, ओन दोर्का पीतुर.

47 अच्चोटेन अगा दग्गेरा नित्तिसि मत्तोरगटाल वरोर ओना कसेर तेंडसि, पेद्दा पेर्माना वरोर दासुना केव नेम्मानाल हीतोर.

48 अस्के येसु ओर्कुन, “वरोन दोंगन पिय्यालय वाताप मिमेट कसेहक, गुत्पां पीसि नाकुन पिय्यालय वातिरा?

49 नना अय्ते रोजे गुळिते कराहसेक मीतोनि मनुंदुन, अस्के नाकुन पिया हिल्लिर. गानि दर्मसास्त्रमते नावा बारेमते रासता पोल्ले पूरा आयाना इंचि, इल्हा जर्गता,” इत्तोर.

50 पजा ओना सिस्स्युल्लक अंतोर ओन होळसि तेगा विततुर.

51 वरोर लेय्या मनकल ओना मेंदुल्लक सिराप चादर हुटकुंचि येसुना पज्जो होंचेके मत्तोर. लोकुल्लक ओनगुडा पीतुर,

52 गानि ओर चादर होळसिसि कुळ्ळेंगे वीततोर.

यहुदि पेद्दाल्लकुना मुन्ने येसुन निपिचमळ

(मत्तयाल 26:57-68; लूकाल 22:54-55,63-71; योहान 18:13-14,19-24)

53 ओर येसुन पेद्दा पेर्माना लोन ओतुर. अगा अंतोर पेर्मालोर्क, यहुदि पेद्दाल्क, दर्मसास्त्रम कराहना गुस्लक जमा आतुर.

54 गानि पन्नु लक्कुटाले येसुना पज्जो-पज्जो पेद्दा पेर्माना दारादाका होत्तोर. अगा सिपाइल्लकुनतोनि तडमितगा सेका कासेक मत्तोर.

55 अगा पेद्दा पेर्मांलोर आनि पंचादितोर अंतोर येसुंक हामुरता सिक्सा हियानाहाटीं, ओना विरोदमते तप्पुड गवाइ पहकतुर, गानि ओर्क उंदिगुडा तप्पुड गवाइ दोर्काहिल्ले.

56 बारित्ते येसुना विरोदमते वेल्लेटोरे आबद्दम गवाइ वेहतुर, गानि ओरा गवाइ वरोनद वरोंक कलिया हिल्ले.

57-58 अस्के इच्चुर लोकुल्क नित्तिसि, “मनकालोर दोहता गुळितुन कूलाहिचि, मूड रोजकुने मर्रा दोहंतन, गानि अद मनकालोर दोहतद आयो, इनानेके मोमोट कैजतोम,” इंचि येसुना विरोदमते गवाइ हीतुर.

59 गानि इवनेगुडा वरोना गवाइ वरोंक कलिया हिल्ले.

60 अस्के पेद्दा पेर्मल नड्डुम नित्तिसि, “ईर नीकु विरोदमते बल्हा गवाइ हीसंतुर हूळा, निमे बतले जवाब हिथ्यिना?” इंचि येसुन पूसकीतोर.

61 गानि ओर चुपचाप मत्तोर, बतले जवाब हिया हिल्लोर. अस्के मरुंदि मल्का पेद्दा पेर्मल येसुन, “निमे कदरगल्ला पेनदा मर्रि किरिस्तुन आंदिना?” इंचि पूसकीतोर.

62 अस्के येसु इत्तोर. “हो, ननाने आंदुन. आनि मनकना रूपमते पुटतोन नाकुन ताकतवर पेनदा तिना बाजुंक उद्दिदिसि मत्तद आनि मब्बु तेर्पेनतोन वायानद मिमेट हळकिर,” इत्तोर.

63 अस्के पेद्दा पेर्मल ओना कपडिं हराहकुंचि, “मनाक इंका बतल गवाइ गावाले?

64 ईर पेनदा अपमानम कीतद मिमेट कैजतिरे गदा! अथ्ते मिमेट बतल इंतिर?” इंचि पेर्मल इत्तस्के, ओर अंतोर, “ओर हामुर सिक्सालायक मंतोर,” इंचि इत्तुर.

65 अस्के इच्चुर लोकुल्क येसुनपोर्री उस्कतुर, इंका इच्चुर बारे ओना कळकुन मुच्चिसि तंचेके, “निमे बविस्थवानि वेहानोनाते, नीकुन बोर तंतुर वेहा,” इंचि इत्तुर. अल्हेने कावेल कियानोरगुडा ओन सेंपापोर्री तंतुर.

येसुन एरपाट किय्योन इंचि पन्नु इनमळ

66 अव अन्नि आयानेके पन्नु हिळ्ळ दाराते उद्दिदिसि मत्तोर, अस्के पेद्दा पेर्मानगा पासि कबळ कियानद उंदि मुरतळ वाता.

67 वासि, पन्नु तळमि सेका कासेक मत्तद हळसि, “निमेगुडा नासरेत नाटेना येसुनतोन मत्तिन गदा!” इंचि इत्ता.

68 गानि पन्नु अद पोल्लेतुन ओप्कुना हिल्लोर. “निमे बतल इंचंतिनो, नाक तेळियो, नना एरपाट किय्योन,” इंचि पलाता गलमातगा होत्तोर, अच्चोटेन गोगोड कूसता.

69 अद पासि कबळ कियाना मुरतळ पन्नुन हळसि, “ईर तप्पाकोटा ओरा लोप्पोटोरे वरोर आंदुर,” इंचि अद मर्रा उंदि मल्का अगा नित्तिसि मननोरतोन इत्ता.

70 गानि पत्रु मर्रा ओप्कुना हिल्लोर. गडसेम मत्तस्के अगा नित्तिसि मत्तोर पत्रुन, “निजमे, निमे ओरा लोप्पोटोने आंदिन, बारित्ते निमेगुडा गालिल राज्येमतोन आंदिन,” इंचि इत्तुर.

71 अस्के पत्रु ओर्कुन, “नना ओट्टु तिचि वेहसेक मंतन, नावा पोल्ले आबद्दम आते नाकु सापनेम दल्लि! मिमेट बोना बारेमते वळकसतिरो, आ मनकन नना निजम एरपाट किय्योन,” इंचि इत्तोर.

72 अल्हा इत्ता इनुडे गोगोड रोंडो मल्का कूसता. येसु पत्रुंक मुन्नेने वेह्चि मत्तोर, “गोगोड रोंड मल्कां कूसाका मुन्ने, निमे नाकुन मूड मल्कां एरपाट किय्योन इंतिन,” इंचि. आ पोल्ले पत्रुंक मति वाता. अस्के वेल्ले दुक्कमते अळतोर.

15

येसुन पिलातुसना कय्दे अप्पजेपमळ

1 बल्हा अय्ते पंग आता अल्हा पेद्दा पेर्मांलोर, यहुदि पेद्दाल्क, दर्मसास्त्रम कराहना गुस्ल्क आनि पूरा पंचादितोर उंदि निरनायम कीसि, येसुन दोह्चि वाट्सि ओसि, पिलातुस राज्यपालुंक अप्पजेपतुर.

2 पजा पिलातुस, “निमे यहुदिल्लुकुना राजाना?” इंचि येसुन पूसकीतोर. “निमे इत्तापे” इंचि येसु जवाब हीतोर.

3 अस्के पेद्दा पेर्मांलोर ओनापोर्रो वेल्लेन पोल्लेना दोसेल्क दोसतुर.

4 अदुनहाटीं पिलातुस येसुन मर्रा पूसकीतोर, “हळा ओर नीवा पोर्रो बच्चुंगो तप्पुक दोस्सेक मंतुर, निमे बतले जवाब हिय्यिना?” इंचि इत्तोर.

5 गानि येसु बतले जवाब हिया हिल्लोर, इंचि पिलातुस इचंत्रम आतोर.

येसुंक हामुरता सिक्सा हियमळ

6 दाटसि होनना पंडुगुना रोजुने, लोकुल्लुकुंक इस्टमातोन एटा वरोन जेलनाल होळिसयाना रिवाज मत्ता.

7 बरब्बल इनना वरोर मनकल ओना दंटातोरतोनि जेलने मत्तोर. ओर ओना दंटातोरतोनि कलियसि, बचुटूरो लोकुल्लुकुन हक्किसि मत्तोर.

8 लोकुल्लक पिलातुसनागा वासि, “एटा मावाहाटीं बल्हा कियिदिनो अल्हेने कीम,” इंचि इत्तुर.

9-10 पेर्मांलोकुक येसुनपोर्री कळक पोतताहेंकेन ओन तच्चि नाक अप्पजेपतुर इंचि पिलातुस एरपाट कीकुत्तोर. अदुनहाटीं पिलातुस ओर्कुन, “मीवा बतल विचारम मंता, यहुदिल्लकुना राजान मीहाटीं होळसीकाना?” इंचि पूसकीतोर.

11 गानि पेर्मांलोकुक, “मावाहाटीं बरब्बने होळसीम इंचि मिमेट इंटु,” इल्हा लोकुल्लकुन एक्किस्तुर.

12 मर्रां पिलातुस ओर्कुन, “अय्ते मिमेट यहुदिल्लकुना राजाल इंचि बोनय्ते इंतोर, ओन नना बतल कीकन,” इंचि पूसकीतोर.

13 अस्के, “ओन क्रुसुनपोर्री वेलाड वाटा!” इंचि ओर वरगेयतुर.

14 अस्के पिलातुस, “बारि, ईर बतल तप्पु कीतोर?” इंचि ओर्कुन पूसकीतोर. गानि ओर इंका जोरते, “ओन क्रुसुनपोर्री वेलाड वाटा!” इंचि वरगेयतुर.

15 पिलातुसुंक लोकुल्लकुन कूस कियाना मत्ता इंचि ओराहाटीं बरब्बन होळसिसि येसुन बारे पोट्टे देब्बां तंचि क्रुसुनपोर्री वेलाड वाटालय सिपाइल्लकुना कय्दे अप्पजेपतोर.

सिपाइल्लक येसुन अपमानम कियमळ

(मत्तयाल 27:27-31; योहान 19:2-3)

16 पजा सिपाइल्लक येसुन पीसि राज्यपालना पिरटोरियम इनना किल्लाते ओतुर. अगा सिपाइल्लकुना पूरा गेंगुन केय्सि जमा कीतुर.

17 ओर येसुंक नेडि पंडि रंगुना कोट केराह्चि, हाह्कुना वेलितुन किरिटम कीसि ओना तल्लक दोसतुर.

18 अस्के ओर, “यहुदिल्लकुना राजांक जय!” इंचेके ओन्क जोहार कीतुर.

19 पजा ओर ओना तल्लापोर्री दुड्डुने तंतुर, ओनपोर्री उस्कतुर, ओर ओना मुन्ने वंगिस जोहार कीतुर.

20 ओन इरगा कारेड्डाल्लक कीतारित्ते, ओन्क केराह्ता नेडि पंडि रंगुना कोट तेंडसि, ओना कपडिं ओन्के केराहतुर. अस्के ओन क्रुसुनपोर्री वेलाड वाटालय पलाते ओतुर.

येसुन क्रुसुनपोर्री वेलाड वाटमळ

(मत्तयाल 27:32-44; लूकाल 23:26-39; योहान 19:17-19)

21 सिपाइल्क येसुन पीसि पलाते होननेके, सिकंदर आनि स्युसना बाबाल सिमोन इनानोर नेलिनाल अदे हरि पीसि वासेक मत्तोर. ओर कुरेनि सहरतोर मत्तोर. सिपाइल्क ओन वेराहचि येसुना कूस कांजा वेहतुर.

22 ओर गोलगोता इनना जागातगा येसुन पीसि वातुर. गोलगोता इत्ते तल्ला बोरसेम इंचि अर्तम.

23 अगा ओर, मुर्* इनना मत्तु अंगुर पंडिना पानकमते कल्पिसि येसुंक उनालय हीतुर, गानि ओर उना हिल्लोर.

24 अस्के ओन कूसुनपोर्रो वेलाड वाटतुर. पजा ओना कपडिन बद बोर एताना इंचि सिट्टिटं वाट्टिस पंचकृतुर.

25 येसुन कूस पोरो मोल्लाने कोह्किसि वेलाड वाटतस्के हक्केटां तोम्मिद एगिस मत्तां.

26 ईर “यहुदिल्कुना राजाल” आंदुर इंचि, उंदि बल्लापोर्रो कसूर रासि ओना तल्लातगा कूसुंक तासतुर.

27 येसुनतोनि इंका इव्वुर दोंगाल्कुन, तिना बाजुंक वरोन, डेमा बाजुंक वरोन कूसकुन पोरो वेलाड वाटतुर.

28 इदुनहेंदाल दर्मसास्त्रमते रासि मत्ताप, “ओर दोंगाल्कुना लेक्काते वातोर”* इद पोल्ले पूरा आता.†

29-30 अद हरि पीसि होनानोर-वायानोर तल्लां ऊपसेके, “ओ! गुळितुन कूलाहिचि मूड रोजकुने दोहानोन, कूसताल रेय्सि निमे नीवा जीवातुन पिसागोटकुन,” इंचि अपमानम कियुंदुर.

31 अल्हेने पेर्मालोर्क, दर्मसास्त्रम कराहना गुस्लकगुडा, “ओर इंकावरोन पिसागोटतोर गानि ओनद ओरे पिसागोटकुना परसेके हिल्लोर.

32 इझ्राएलतोर राजाल किरिस्तु कूसुनपोर्रोटाल हिळु रेय्सि वायिरकांटी, अस्के मोमोट हळसि, इनपोर्रो विस्वासम ईरा परकोम,” इंचेके ओना कारेड्डाल्क कीतुर. येसुना पक्काते कूसुंक वेलाड वाट्टिस मत्ता दोंगाल्कगुडा ओना अपमानम कीतुर.

येसुना हामुर

(मत्तयाल 27:45-56; लूकाल 23:44-49; योहान 19:28-30)

* 15:23 मुर् इत्ते नोप्पि तक्को कियाना उंदि मत्तु. ☆ 15:28 यसायाह 53:12 † 15:28 इद वचनम कोन्नि पांडु लिपिने हिल्ले.

33 अस्के पिथ्यटा पन्नेंड एगानस्केटाल अय्ते, मूड एगनदाका पूरा बूमिअंता हीकट आता.

34 पिथ्यटा मूड एगनेके येसु अळसेके जोरसे वरगेयसि, “एलि, एलि, लमा सबकतनि?” इंचि इत्तोर. इत्ते, “ना पेनदुना, ना पेनदुना निमे नाकुन बारि होळसीतिन?” इंचि इत्तोर.

35 अस्के अगा नित्तिसि मत्तुर इच्चुर लोकुल्क, “हुळाट! ओर एलियान केयसंतोर,” इंचि इत्तुर.

36 ओरा लोप्पोटाल वरोर विच्चि होंचि स्पंजतुन पुल्लाटा अंगुर पानकमते मुळहाचि, दुडुडु कोस्सक तासिसि ओनकु उनालय हीतोर. हीसि, “आगा! एलियाल ओन हिळ रेहालय वांतोरा वायोरा? हळकोम,” इंचि इत्तोर.

37 अस्के येसु पेद्दा आवाजते वरगेयसि जीवा होळसीतोर.

38 अस्के गुळिता परदा पोर्रोटाल हिळदाका हर्सि रोंडु तुकडां आता.

39 अस्के नूर मंदि सिपाइल्कुना पोर्रो मनना अदिकारि येसुना कृसता मुन्नेने नित्तिसि मत्तोर. ओर येसु वरगेयसेके जीवा होळसनद हळतोर, हळसि, “इर निजमे पेनदा मरि आंदुर,” इंचि इत्तोर.

40 अगा मगदलेनि नाटेना मरियम, सिन्ना याकोब, योसेसना यावल मरियम, सलोमि इव मुर्ताहकगुडा लक्कुटाले नित्तिसि हळसेक मत्तां.

41 येसु गालिल एरियाते मत्तस्के, इव मुर्ताहक ओना पज्जो होंचि सेवा कियुंदुं. इवे आयाका ओना पज्जो येस्सलेमदाका वातव इंका वेल्लेन मुर्ताहक मत्तां.

येसुन बोंदा दोसमळ

(मत्तयाल 27:57-61; लूकाल 23:50-56; योहान 19:38-42)

42 नोमकेन रोजुना मुन्नेटा रोजु येसु हातोर, अद नोमकेमता तयारिता रोजु आंदुं, अस्के पोळुदु होंचि मत्ता.

43 अरिमताइ नाटेनोर योसेपु इनानोर वरोर मत्तोर. ओर यहुदिल्कुना पंचादिता वरोर मेंबर मत्तोर. लोकुल्क ओन्क कदर हियुंदुर. ओर पेनदा राज्येम बस्के वायार इंचि एदुर हळसेक मनुंदुर. ओर दैरनेमते पिलातुसनगा होंचि, “येसुना पीनगुन नाक हीम,” इंचि तल्कतोर.

44 अस्के पिलातुस, “अरे! इच्चोन बिराना हातोरा” इंचि इचंत्रम आतोर. पजा नूर मंदि सिपाइल्कुना पोर्रो मनना अदिकारिन केय्सि, “येसु हातोरा?” इंचि पूसकीतोर.

45 येसु हातोर इंचि ओर अदिकारि वेहतस्के, ओना पीनगुन ओया परांतिन इंचि पिलातुस योसेपुन इत्तोर.

46 अस्के योसेपु उंदि पूना कपडि अस्तोर. येसुन कूसतगटाल हिळु रेहचि, अद कपडितुन हुटतोर. हुटसि, बंडातुन तुलाहिचि तयार कीता बोंदाते दोसतोर. पजा दाना बोंगाकु उंदि पेद्दा बंडा अड्डम दोसतोर.‡

47 येसुन बोंदाते दोसता जेगातुन मगदलेनि नाटेना मरियम, योसेसुना यावल मरियम इव हळतां.

16

येसु मरी जीवाते तेदमळ

(मत्तयाल 28:1-8; लूकाल 24:1-12; योहान 20:1-10)

1 नोमकेमता रोजु मारतारित्ते, मगदलेनि नाटेना मरियम, याकोबुना यावल मरियम आनि सलोमि इव येसुना पीनगुंक होकालय, गमागमा गब्बु वायानव वस्तुक अस्तां.

2 वारमता मोदाटा रोज अयतारम हक्केरेने पोळ्दु पेयसता पेयसुळे बोंदातगा होत्तां.

3 अव होननेके, “अद बोंदक अड्डम दोसता बंडातुन मनाहाटीं बोर गुळाहनुर?” इंचि अबुनद अवे वळकसेक होत्तां.

4 अगा एवसि हळते, अच्चोन पेद्दा बंडा गूळसि मत्तद अवुंक दिसता.

5 अव बोंदाते होळियतस्के वरोर लेय्या मनकल तेल्लाटा कपडिं केर्सि तिना बाजुंक उदिद्स मत्तद हळसि अव वेरियतां.

6 ओर अबुन इल्हा इत्तोर. “वेरियमट, कूसुनपोरों वेलाड वाट्सि हक्कता, आ नासरेत नाटेना येसुन मिमेट पहकसेक मंतिट, ओर इग्गे हिल्लोर, जीवाते तेदतोर. इद हुळाट, ओना पीनगु इरता जेगा.

7 ओर मीक वेहता परकारम, मीकन्ना मुन्नेने गालिल एरियाते होंचेक मंतोर, अदुनहाटीं मिमेट होंचि ओना सिस्युलकुंक आनि पत्रुंक वेहाट, अगा ओर मीकु दिस्सानुर,” इत्तोर.

8 अव मुर्ताहक इरगा वेरियसि वनकालय दल्गतां. अदुनहाटीं अव बोंदातगाटाल पलाते पेय्सि विच्चि, आ वेरेंक बोर्क बतल वेहा हिल्लें.

‡ 15:46 अद कालमते गुट्टांकु सोंरि तवसि इरुंदुर. बोरन्ना हाते अवने ओसि दोसुंदुर.

मगदलेनि नाटेना मरियमुंक येसु दिसंतोर

9 वारमता मोदाटा रोज इत्ते अयतारम रोज, येसु हामुरताल जीवाते तेदतोर. तेदता पजा मोट्टा मोदाला मगदलेनि नाटेना मरियमुंक दिसतोर. इदे मरियमुनगटाल एडुं देय्याल्कुन येसु गेदमिस मत्तोर.

10 अद अगटाल पेय्मि, येसुनतोनि मत्ता सिस्युल्कुनगा होत्ता. ओर वेल्लेने दुक्कमते अळसेके मत्तुर, ओर्क येसुना बारेमते वेहता.

11 येसु जीवाते तेदतोर, अद येसुन हळता इत्ता पोल्लेतुन ओर केंजतुर गानि विस्वासम किया हिल्लुर.

12 अद आता पजा, ओरा लोप्पोटाल इव्वुर येस्सलेमताल उंदि नार होंचेके मननेके, ओर्क वेरे रूपमते येसु दिसतोर.

13 ओर पज्जो मल्सि होंचि, कळमतोर्कुंक इद पोल्ले वेहतुर, गानि ओर ईरा पोल्लेन विस्वासम किया हिल्लुर.

येसु ओना सिस्युल्कुनतोनि वळकंतोर

(मत्तयाल 28:16-20; लूकाल 24:36-49; योहान 20:19-23;

प्रेरितुल्कुना कबाहक 1:6-8)

14 पजा पदाकोंडु मंदि सिस्युल्कु उद्दिदिसि गाटो तिचेके मननेके येसु ओर्क दिसतोर. “नना जीवाते तेदतन इंचि वेल्लेटुर मीक वेहिनागानि मिमेट बारि विस्वासम किया हिल्लिर? मीवा मनसुक बंडालेसीं मारियतां,” इंचि तेराहतोर.

15 पजा ओर्कु इल्हा वेहतोर. “मिमेट होंचि दुनियाता अन्नि देसेल्कुना लोकल्लुकुंक बेसता कबुर प्रचार कीम्टु.

16 बोर अयते विस्वासम कीसि, बापतिस्मा एतंतोर ओनके मुक्ति दोर्कता, गानि बोर अयते विस्वासम किय्योर, ओनकु पेन सिक्साता आदेस हिय्यार.

17 नाकुन विस्वासम कियानोनगा इव चिन्हां मनंतां, ओर नावा पोरोलते देय्याल्कुन गेदमानुर, वेरे-वेरे बासाने वळकानुर,

18 तरासकुन पियानुर, बदे विसम वस्तु उनिनागानि ओर्क बतल आयो, बिमार्क मत्तुरा पोर्री ओरा कय्क इरते, ओर बेस आयानुर,” इंचि वेहतोर.

येसु स्वर्गमते होनमळ

(लूकाल 24:50-53; प्रेरितुल्कुना कबाहक 1:9-11)

19 येसु सामि ओना सिस्युल्कुनतोनि इव पोल्लें वेहता पजा, पेन ओन स्वर्गमते तेहकुत्ता. अस्के ओर दाना तिना बाजुंक उद्दतोर.

20 पजा येसुना सिस्स्युल्लकु नालुं-मूलां होंचि अन्नि जेगाने ओना बारेमते प्रचार कीतुर. सामि ओरतोनि मंचेके कबळ कियुंदुर. कबळ कियनेके जर्गना चिन्हाना हेंदाल सामि ओना पोल्ले निजम इंचि रुजुव कियुंदुर. आमेन.*

* **16:20** इद वचनम कोन्नि पांडु लिपिने हिल्ले.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068